

永樂大典

卷七千八百五十六  
之七千八百五十七



永樂大典卷之七千八百五十六

十九庚

星

太白星

史記天官書。察日行以處位太白。曰西方秋。司兵。月行及天矢。日庚辛。主殺。殺失者。罰出太白。太白失行。以其舍命國。其出行十八舍。二百四十日而入。入東方伏行十一舍。百三十日。其入西方伏行三舍。十六日而出。當出不出。當入不入。是謂失舍。不有破軍。必有國君之篡。其紀上元。以攝提格之歲。與營室晨出東方。至角而入。與營室夕出西方。至角而入。與角晨出入畢。與角夕出入畢。與畢晨出入箕。與畢夕出入箕。與箕晨出入柳。與箕夕出入柳。與柳晨出入營室。與柳夕出入營室。凡出入東西各五。為一歲。二百二十日。徐廣曰。一云三十二日。復與營室晨出東方。其大率歲一周天。其始出東方。行遲。率日半度。一百二十日。必逆行一二舍。上極而反東行。行日一度。半一百二十日入。其庫近日曰明星。柔。高遠日曰大翼。徐廣曰。一作變剛。其始出西行疾。率日一度。半。百二十日上極而行。遲日半度。百二十日旦入。必逆行一二舍而入。其



庫近曰曰太白柔。高遠曰大相剛。出以辰戌。入以丑未。當出而出。未當入而入。天下偃兵。兵在外。入未當出而出。當入而不入。下起兵。有破國。其當期出也。其國昌。其出東為東。入東為北方。出西為西。入西為南方。所居久其鄉利。疾蘇林曰疾過也。其鄉凶。出西逆行至東。正西國吉。出東至西。正東國吉。其出不經天。經天。天下革政。小以角動。兵起。始出大後小。兵弱。出小後大。兵強。出高。用兵深吉。淺凶。庫。淺吉深凶。日方南。金居其南。日方北。金居其北。曰羸。侯王不寧。用兵進吉。退凶。日方南。金居其北。日方北。金居其南。曰縮。侯王有憂。用兵退吉。進凶。用兵象太白。太白行疾。疾行。遲。遲行。角。敢戰。動。搖。躁。躁。順。圖。以。靜。靜。順。角。所。指。吉。反。之。皆。凶。出。則。出。兵。入。則。入。兵。赤。角。有。戰。白。角。有。喪。黑。圖。角。憂。有。水。事。青。圖。小。角。憂。有。木。事。黃。圖。和。角。有。王。事。有。年。其。已。出。三。日。而。復。有。微。入。入。三。日。乃。復。盛。出。是。謂。爽。晉灼曰。爽。逆。之。不。進。其。下。國。有。軍。敗。將。北。其。已。入。三。日。又。復。微。出。出。三。日。而。復。盛。入。其。下。國。有。憂。師。有。糧。食。兵。革。遺。人。用。之。卒。雖。衆。將。為。人。虜。其。出。西。失。行。外。國。敗。其。出。東。失。行。中。國。敗。其。色。大。圖。黃。澤。音。澤。可。為。好。事。其。圖。大。赤。兵。盛。不。戰。太。白。白。比。狼。赤。比。心。黃。比。參。左。肩。蒼。比。參。右。肩。黑。比。奎。大。星。五。星。皆。從。太。白。而。聚。乎。一。舍。其。下。之。國。可。以。兵。從。天。下。居。實。有。得。也。居。虛。無。得。也。行。

勝色。晉灼曰。太白行得度者。勝色也。色勝位。有位勝無位。有色勝無色。行得盡勝之。晉灼曰。行應天度。唯有色得位。行盡勝之。行重而色位輕。星經

得字作德。出而留桑榆間。晉灼曰。行遲而下也。正出氣言平正出桑榆上者。餘二千里。疾其下國。上而疾未盡其日。過參天。晉灼曰。三分天過之。其

一此在戌酉之間。疾其對國。孟康曰。謂出東入西。出西入東。上復下。下復

上。有反將。其入月將。金木星合光。其下戰。不合。兵雖起而不鬪。合相毀。

野有破軍。出西方。昏而出陰。陰兵強。暮食出小弱。夜半出中弱。鷄鳴出大

弱。是謂陰陷於陽。其在東方。乘明而出陽。陽兵之強。鷄鳴出小弱。夜半出

中弱。昏出大弱。是謂陽陷於陰。太白伏也。以出兵。兵有殃。其出卯南。南勝

北方。出卯北。北勝南方。正在卯東。國利。出酉北。北勝南方。出酉南。南勝北方。

正在酉。西國勝。其與列星相犯。小戰。五星大戰。其相犯。太白出其南。南國

敗。出其北。北國敗。行疾武。不行文。色白五芒。出蚤為月蝕。晚為天祲。及彗

星將發其國。出東為德。舉事左之迎之吉。出西為刑。舉事右之背之吉。反

之皆凶。太白光見景。戰勝。晝見而經天。是謂爭明。強國弱。小國強。女主昌。

亢為䟽廟。太白廟也。太白大臣也。其號上公。其他名。殷星。太正。營星。觀星。宮星。明星。大衰。大澤。終星。大相。天浩。序星。月緯。大司馬位。謹候此。西漢書。

天文志。太白曰西方。秋金義也。言也。義虧言失。逆秋令。傷金氣。罰見太白。太白經天。天下革。民更王。孟康曰。謂出東入西。出西入東也。太白陰星。出東當伏東。出西當伏西。過午為經天。晉灼曰。日陽也。日出則星亡。晝見午上為經天。是為亂紀。人民流亡。晝見與日爭明。疆國弱。小國疆。女主昌。太白者猶軍也。而熒惑憂也。故熒惑從太白。軍憂。離之軍舒。出太白之陰。有分軍。出其陽。有偏將之戰。當其行太白還之。破軍殺將。辰星殺伐之氣。戰鬪之象也。與太白俱出東方。皆赤而角。夷狄敗。中國勝。與太白俱出西方。皆赤而角。中國敗。夷狄勝。續後漢書。金行之精。白帝之神。先氣之曜。是為太白。徑一百五十里。於乾為利。於德為義。於事為言。其位西方。其日庚辛。其時主秋。其色白。其音商。其性嚴厲。收物之星也。日行一度二十七分。一月行一辰。一歲周天。常以正月甲寅。與熒惑晨出東方。二百四十日伏。伏四十日。又出西方二百四十日而伏。伏三十日。而復出東方。出以辰戌。入以丑未。其入其出。必以風雨。春見東方以晨。秋見西方以夕。其出不過參天。三分天之一。辰卯申酉之間也。過午為經天。太白陰星也。出東當伏東。出西當伏西。故出不過三天。日陽也。日出則星亡。太白乃晝見。午上行而過之。謂之經天。謂之太白者。取其方色命之也。晨出東曰啓明。夕出西曰太白。一曰殷星。一曰大正。一曰營星。一曰

觀星。一曰宮星。一曰大衰。一曰大澤。一曰終星。一曰大相。一曰天浩。一曰序星。一曰月緯。一曰開星。一曰火鼻。一曰衆星。一曰官星。一曰梁星。一曰大翼。一曰天表。一曰大奘。凡二十有二名。附日而行。仲冬日月會于角亢。太白亦會于角亢。亢為太白廟。謂之疏廟。故曰察日行以處太白。其精為兩師。佐天為大司馬。大將軍。位上公。掌九伐之法。以行天討。又為女主。主罰。凡金革兵械。行陳法令。師衆律度。車騎部曲。皆主之。司又典。致時陽。又時陽若。主西嶽。於地則主秦隴。羗戎西域。白光靜潤。軌道無變。則天子有道。中國安疆。師貞而文人吉。王者恃義好殺。綸綍不從。不能利物而反害之。逆秋令。傷金氣。則太白行罰。緩則不出。急則不入。逆則占。其始出東方。行遲率日半度。一百二十日必逆行。一二舍。上極而反東行。率日一度半。二百二十日入。其庫近日曰明星。柔。高遠日曰大翼。剛。其始出西方。行疾率日一度半。百二十日上極而行。遲日半度。百二十日旦入。必逆行。一二舍而入。其庫近日曰太白。柔。高遠日曰大相。剛。當出不出。當入不入。是謂失舍。必有破軍篡國。野死之王。當出不出。未當入而入。天下偃兵。兵在外。未當出而出。當入而不入。天下兵起。所當之國破。未當出而出。未當入而入。天下兵起。所當之國亡。當期而出。其國昌。出東為東方。入為北方。出

西為西方。入為南方。所居久。其國利。易其鄉凶。鄉。向也。出西逆行至東。正西國吉。出東至西。正東國吉。入七日復出。將軍戰死。入十日復出。相死。入又復出。王者惡之。出三日而復微入。入三日乃復盛出。是謂與而伏。與退也。其下軍破將敗。已入三日又復微出。出三日乃復盛入。其下國有憂。兵雖衆。敵食其穀。帥雖多。將為人虜。出東為德。舉事左之迎之吉。出西為刑。舉事右之背之吉。反之皆凶。西出失行。夷狄敗。東出失行。中國敗。色白五芒。出發為月食。先期而出。與月相凌不見者則食。晚為天祇孳孳。發無道之國。出而留桑榆間。病其下國。行遲而下也。舉日平正出桑榆上二千里。上而疾過參天。木中之間。疾其對國。上復下。下復上。有反將。經天。天下革命。是為亂紀。人民流亡。晝見與日爭明。疆國弱。弱國疆。女主昌。日方南。太白居其南。日方北。太白居其北。為羸。侯王不寧。用兵進吉退凶。日方南。太白居其北。日方北。太白居其南。為縮。侯王有憂。用兵退吉進凶。出高。用兵深吉淺凶。卑。淺吉深凶。行疾。用兵疾吉遲凶。行遲。用兵遲吉疾凶。出大後。小兵弱。出小後。大兵強。小以角動。兵起。角敢戰吉。不戰凶。擊角所指吉。逆之凶。進退左右。用兵進退左右吉。動搖躁。躁吉靜凶。圓以靜。靜吉躁凶。出則兵出。入則兵入。出西方昏。而出陰。陰兵強。暮食出。小弱。夜半出。中弱。鷄

鳴出。大弱。是謂陰陷於陽。其在東方。乘明而出。陽兵強。鷄鳴出。小弱。夜半出。中弱。昏出。大弱。是謂陽陷於陰。伏而出兵。兵有殃。出卯南。南勝北方。出卯北。北勝南方。正出卯。東國勝。出酉北。北勝南方。出酉南。南勝北方。正出酉。西國勝。其色大。圓黃。澤。音澤。潤也。可為好事。其圓大。赤。兵盛不戰。其白。比。狼。赤。比。心。黃。比。參。左。肩。蒼。比。參。右。肩。黑。比。奎。大。星。赤。角。有。戰。白。角。有。喪。黑。圓。角。憂。有。水。事。青。圓。小。角。憂。有。木。事。黃。圓。和。角。有。土。事。有。年。角。明。見。影。戰。勝。黑。角。銳。刺。伏。兵。大。戰。居。實。有。得。居。虛。無。得。實。在。宿。合。度。虛。羸。縮。不。常。也。行。勝。色。合。度。勝。色。正。色。勝。位。色。正。勝。居。宿。有。位。勝。無。位。有。色。勝。無。色。行。得。盡。勝。之。行。得。其。道。也。得。一。作。德。當。見。而。忽。亡。則。為。壯。夫。處。於。林。麓。以。發。兵。禍。大。呼。羣。起。革。命。易。主。月。食。以。強。國。戰。襲。月。則。大。將。戮。女。主。憂。行。與。月。並。為。戰。並。西。方。主。戰。並。東。方。客。戰。一。尺。而。城。拔。二。尺。而。國。病。三。尺。而。軍。憂。五。尺。則。不。戰。出。東。方。若。西。方。晦。而。未。盡。三。日。朔。而。始。生。三。日。與。月。並。其。間。容。指。入。月。八。日。戰。主。敗。破。軍。殺。將。二。指。則。入。月。十。二。日。主。敗。城。拔。三。指。則。入。月。十。七。日。主。敗。將。走。四。指。則。入。月。二十。日。兩。軍。交。綏。客。主。俱。敗。五。指。則。守。而。不。攻。陳。而。不。戰。入。房。心。間。謂。之。金。上。堂。逆。兵。犯。君。九。犯。列。星。小。戰。五。星。大。戰。其。相。犯。太。白。出。其。南。南。國。敗。出。其。北。北。國。敗。行。疾。武。不。行。文。遇。

火兵喪大起。與木合光戰不合不戰。合相毀。有破軍殺將。故天子將將。將軍將兵。必謹候太白。居舍而四星來聚其分。真人以義致天下。其精變而生祿星。則為天杵。天杵。伏靈。大敗。司姦。天狗。賊星。天殘。卒起。若星。帚星。若彗。竹彗。牆星。棟星。白。蒼。白。彗。凡十有七星。出以庚寅。兩白方在旁。天狗星。狀如大奔星。色黃。有毛。尾旁有短彗。有聲如雷。其下止地。類狗所墮。望之如火。光炎炎。音暗。衝天。其上銳。其下圓。如數頃田。或謂狀赤白。有光。下即為天狗。又謂流星有光。見人面。墜無聲。若有足者。曰天狗。其色白。其中黃。如遺火狀。主守禦。候兵討賊。出則天下大戰。破軍殺將。人相食。其下流血千里。天狗飲之。國亡革政。其惡氣所鍾。又甚彗。其衝禍尤重。賊星亦名六賊。出正南方。去地可六丈。大而赤。數動有光。或謂狀如彗。惡氣如六殘。出則天下禍合。逆殺開樞。其下兵起。不利其衝。凡有象占者。二星。晉書天文志。太白曰西方秋。金義也。言也。義虧言失。逆秋令。傷金氣。罰見太白。太白進退以候兵。高卑遲速。靜躁見伏。用兵皆象之吉。其出西方失行。夷狄敗。出東方失行。中國敗。未盡期曰過參天。病其對國。若經天。天下革。民史主。是謂亂紀。人眾流亡。晝見與日爭明。強國弱。小國強。女主昌。又曰太白主大臣。其號王公也。大司馬位謹候此。隋書天文志。太白之精。散為天

杵。天杵。伏靈。大敗。司姦。天狗。天殘。卒起。一曰天杵。主牂羊。二曰天杵。主擊。殃。三曰伏靈。主領讒。伏靈出。天下亂。復人。四曰大敗。主鬪衝。或曰大敗出。擊咎謀。五曰司姦。主見妖。六曰天狗。亦曰五星氣合之變。出西南。金火氣合。名曰天狗。或曰天狗星有毛。旁有短彗。下有如狗形者。主徵兵。主討賊。亦曰天狗流。五將鬪。又曰。西北方有星長三丈。而出。水金氣交。名曰天狗。亦曰。西北三星大而白。名曰天狗。見則大兵起。天下饑。人相食。又曰。天狗所下之處。必有大戰。破軍殺將。伏尸流血。天狗食之。皆期一年。中二年。遠三年。各以其所下之國。以占吉凶。後流星內天狗名同。占狀小異。七曰天殘。主貪殘。八曰卒起。卒起見禍。無時諸變。有萌臣運柄。又曰。小陰之精。大司馬之類。白獸七宿之域。有謀反。若恣虐為害。主失秋政者。期如上。占禍亦應之。五代史。太白周率四百二十萬。四十一百四十三。九十六。變率四百二十萬。四十一百四十三。九十六。曆率二百六十二萬九千七百五十五。十六。周策五百八十三萬六千五百四十三。九十六。曆中一百八十二。四千四百七十五。二十八。變段。變日。變度。變曆。變段。變日。變度。變曆。夕見。四十二。五十三。四。五十一。七。順疾。九十六。百二十一。五十七。一百二十六。九十九。

次疾	七十三	八十	七十七	次遲	三十三	三十四	三十二
順遲	二十四	二十一	二十一	前留	六	六	二十九
退遲	四	一	空	退疾	六	三	二十二
夕伏	七	四	一	晨見	七	四	三十七
退疾	六	三	一	退遲	二十四	一	空
後留	六	六十九	六十九	順遲	二十四	一十一	一十一
次遲	三十三	三十四	三十二	次疾	七十三	八十三	七十七
順疾	九十六	一百一	一百一	晨伏	四十二	五十三	五十一

宋史天文志。太白為西方為秋。為金於人五常義也。五事言也。常以正月甲寅與火晨出東方。二百四十日而入。入四十日又出西方。二百四十日而入。入三十五日而復出東方。出以寅戌。入以丑未也。一年一周天。星經曰。主華陰山。涼雍益州。又主奎婁胃昂畢甯參。巫咸曰。光明見影。戰勝歲熟。狀炎然而上。兵起。光如張蓋。下有立王。凡與歲星相犯。兵敗失地。犯熒惑。客敗主勝。犯填星。太子不安。失地。犯辰星。主兵入月。主死其下。兵犯月角。兵起在左則中國勝。在右則外國勝。當見不見。失地破軍。他星犯。其事急。祿星犯。邊城有戰。客星犯。主兵將死。凡太白至午位避日而伏。若行至未

即為經天。其災異重也。三境圖論。夫金德者。西方太白將軍之像也。行度有退留順逆。與日同度。則曰合伏。行三十九日與日相去一十度半。而夕見西方。順行二百三十三日而留。留五日而順。順行二百三十三日乃謂晨伏。伏行三十九日。復與日同度而合。積五百八十三日九十分二十七秒。為一終之數。此乃俗論。吾教言之。金水下離太陽前後。風吹運遲在日後見。謂之夕伏。連遲日前合後晨見。謂之晨運。如至治壬戌六月初四日庚午。金日同往在柳四度。謂夕伏合。此日酉時。日金柳四星同沒。酉宮至初五日辛未。日沒酉時。其柳四度遠過日一度。則於酉初西沒。金遲日後二十分一秒半。計遲離日三百三十一里。則於酉末西沒。卯末東升。如是漸運。至七月十九日甲寅。計遲四十四周。則夕見于西方。酉戌西沒。卯辰東升。運九十周。戌亥西沒。辰巳東升。與日相去四十五度。離日既遠。則又連運。每日連運八十分。漸六十二轉。巳辰東升。亥戌西沒。運轉七周。趕上四十五度。與日同出。同沒。謂之晨合。合後七轉。晨見東方。寅丑東升。申未西沒。六十二周。丑子東升。未午西沒。與日相離四十五度。晨計七百一十一萬二千一百二十餘里。離日既遠。復遲待日。遲運九十周末。申酉西沒。丑寅東升。行九十日。申酉西沒。寅卯東升。四十四日。酉戌西沒。卯辰東升。則謂晨伏。如是二合二伏。總計五百八十三日九十分二十七秒。金行始終。周而復始。記纂淵海。君乘金而王。則太白揚光。禮斗威儀。太白合表。四夷從服之象。考經授神契。遼史曆象志。金星

初與日合伏三十九日餘三萬一千一百二十六行四十九度度餘三萬八千一百二十  
六夕見西方從疾日行一度五分九十二日行百十二度小遲日行一度四分九十二日  
行百八度大遲日行十七分四十五日行二十三度六分留九日遲日行十六分  
九日退六度六分夕伏西方伏五日退五度而與日合又五日退五度而晨見東  
方遲日行十六分九日留九日從日遲日行十七分四十五日小疾日行一度四  
分九十二日大疾日行一度五分九十二日晨伏東方日度餘如初一終五百  
八十三日日餘三萬六千七百六十一行星如之除一周定行二百十八度度餘  
二萬六千三百一十三合二百九十一日餘三萬八千一百二十六行星亦如  
之太白凌犯西漢書王莽傳地皇五年秋太白星流入太微燭地如月光東漢書  
光武建武六年太白經太微九年正月乙卯太白犯婁南星章帝建初元年正月  
丁巳太白在昴西一尺二月甲申入斗魁三年正月己亥入斗中五月丙寅入  
畢口閏月己未犯太微六月癸酉入輿鬼四年四月壬戌入輿鬼五月辛巳入南  
斗口中丙戌犯鉞星六年四月癸丑入輿鬼六月辛巳犯左執法 和帝永元  
六年六月丁亥太白在東井 安帝永寧十年之中太白入輿鬼一守畢再犯  
左執法入南斗犯鉞星 永初三年正月己亥太白入斗中 元初三年閏月  
己未太白犯太微左執法五年五月丙戌太白犯鉞星六年四月辛未犯左執法

延光四年四月甲辰太白入輿鬼六月壬辰出太微 桓帝建和三年五月己  
丑太白入太微右掖門留十五日出端門 永壽二年八月戊午太白犯軒轅大  
星三年七月丁丑太白犯心前星 延禧七年十月丙辰犯房北星為後宮八  
年五月癸酉太白犯輿鬼質星閏月己未犯心前星九年六月壬戌太白入輿  
鬼 獻帝興平二年春太白犯填星於牛斗過天津晉書惠帝光熙元年五月  
丙戌太白犯鉞星 成帝咸康元年二月乙未太白入月四月甲午月犯太白  
穆帝永和二年八月壬申太白犯左執法 升平元年二月太白入東井四月壬  
子入輿鬼 太和二年八月戊午太白犯歲星在太微 安帝元興元年二月  
戊子太白犯五諸侯三年八月癸丑太白犯房北第二星十月甲戌太白犯泣  
星 義熙四年六月太白犯太微西上將又犯左執法六年九月甲寅太白犯左  
執法七年八月乙未太白犯房南第二星十一月犯哭星十年九月丁巳太白入  
羽林十一年八月庚申太白從行右掖門入太微丁卯掩左執法十二年六月壬  
子太白順行入太微右掖門十四年三月癸巳太白犯五諸侯八月甲子太白犯  
軒轅九月乙未太白入太微犯左執法 元熙元年六月庚辰太白犯太微宋書  
文帝元嘉八年五月太白犯天關東井七月丁丑太白犯上將八月癸未太白入  
太微右掖門內犯左執法九年四月己丑太白入積尸五月太白犯軒轅八月癸未太



白犯心前星。乙酉犯心明堂星。十二年十二月甲申。太白犯羽林。十六年五月  
太白犯畢。二十二年四月太白入軒轅。二十七年九月太白犯歲星。景和元  
年十一月丁未。太白犯哭星。南齊書高帝建元元年八月辛亥。太白犯軒轅  
大星。九月癸丑。太白從行於軫。犯填星。四年七月己未。太白有光影。八月戊子  
太白從軒轅。犯女主星。甲辰太白從行犯軒轅少民星。九月己卯。太白從行  
犯太微西蕃上將。辛酉太白從行入太微。在左執法星西北一尺。戊辰太白  
從行犯太微左執法。十二月壬子。太白從行犯填星。在氐度。丙辰太白從  
行犯房北頭第一星。丁卯太白犯鍵閉星。永明元年六月己酉。太白行  
犯太微上將星。辛酉太白行犯太微左執法。八月甲申。太白犯南斗第四  
星。九月乙酉。太白犯南斗第三星。十月丁卯。太白犯哭星。二年三月甲戌。  
太白從行入羽林。四月丙申。太白從行犯東井鉞星。六月己巳。太白從行  
與鬼度犯歲星。三年五月戊子。太白犯少民星。十一月壬申。太白從行入  
氐。四年十一月庚子。太白入羽林。又犯天關。五年五月庚子。太白三犯畢  
左股第一星。西南一尺。六月甲戌。太白犯東井北轅第三星。在西一尺。八  
月甲寅。太白從行入軒轅。在女主星東北一尺二寸。不為犯。戊辰太白從  
在太微西蕃上將星西南五寸。辛巳太白從在太微左執法星西北四寸。

六年四月辛酉。太白從在熒惑北三寸為犯。並在東井度。六月己巳。太白  
從在太微西蕃右執法星東南四寸為犯。七月癸巳。太白在氐角星東北  
一尺為犯。八月乙亥。太白從行在房南第二左股次將星西南一尺為犯。  
十一月戊午。太白從在歲星西北四尺。同在尾度。又在熒惑東北六尺五  
寸。在心度合宿。十二月壬寅。太白從行在填星西南二尺五寸斗度。七年  
二月辛巳。太白從行入羽林。十月癸酉。太白在歲星南。相去一尺六寸。從  
在箕度為合。十一月丁卯。太白從行入羽林。八年八月庚辰。太白從在軒  
轅女主星南七尺為犯。九月丙申。太白從行在太微西蕃上將星西南一  
尺為犯。丁未。太白從行入太微。辛酉。太白從行在進賢。西五寸為犯。十月  
乙亥。太白從行在亢南第二星。西南一尺為犯。甲申。太白從行入氐。十一  
月戊戌。太白從行在房北頭第二星東北一寸。又在鍵閉星西南七寸。並  
為犯。又在熒惑西北二尺。為合宿。癸卯。太白從行在熒惑東北一尺為犯。  
九年四月癸未。太白從歷夕。見西方從疾參宿一度。比來多陰。至己丑。開  
除。已見在日北當西北維上。薄昏不見宿星。則為先歷而見。七月辛卯。太  
白從行入太微。在西蕃上將星北四寸為犯。九月乙亥。太白從行在南斗  
第四星北二寸為犯。丁卯。太白在南斗第三星西一寸為犯。十年二月甲

辰。太白從行入羽林。五月辛巳。太白從行入東井。在軒轅西第一星東。六寸為犯。七月乙丑。太白從行在軒轅大星東。八寸為犯。十一年正月戊辰。太白從行在歲星西北。六寸為犯。在奎度。二月丁丑。太白從行東井北。轅西頭第一星東北。一尺為犯。四月戊子。太白在五諸侯東第二星西北。六寸為犯。辛丑。太白從行入輿鬼。在東北星西南四寸為犯。五月癸亥。太白從行入軒轅大星北。一尺二寸無所犯。十月丙戌。太白行在進賢星西南四寸為犯。十一月戊戌。太白從行入氐。丁卯。太白從行在鍵閉星西北。六寸為犯。十二月壬辰。太白從行在南斗第六星東南。一尺為犯。辛丑。太白從行在西建東星西南。一尺為犯。永元元年正月丁酉。太白掩牽牛。牽牛越分。齊和帝紀。永元二年十一月甲寅。長史蕭穎曾奉帝舉兵。其日太白及辰。俱見西方。**宋書**天文志。梁武帝天監二年七月丙子。太白犯軒轅大星。十四年十月辛未。太白犯南斗。紹泰元年。太白自十一月丙戌不見。乙卯。出于東方。永定三年甲子。太白犯五車填星。七月。太白犯輿鬼。五年四月癸卯。犯房上星。五月癸未。太白犯右執法。辛卯。犯左執法。天嘉三年二月甲子。太白犯五車填星。七月。太白犯輿鬼。八月庚申。入太微。光大二年六月丙寅。太白犯右執法。天賜二年十一月丙戌。太白掩鉤

鈴。三年十二月丁未。太白與火入羽林。四年八月掩火。犯左執法。元帝泰常元年六月。太白由掖門入太微。七年正月。太白犯南斗。三月壬戌。太白又犯之。太武帝大延元年十二月。太白犯羽林。二年三月。太白犯右執法。及上相。五年五月。太白入羽林。犯畢。高宗太安元年四月。太白犯輿星。和平四年五月。太白與火犯上相。五年六月。太白與火入井。顯祖天安元年六月。太白犯左執法。太和三年九月。庚子。太白犯左執法。十一月丙戌。月犯之。四年二月辛巳。月又犯之。九月壬戌。太白又犯之。四年二月。太白犯軒轅第二星。六年正月。太白犯軒轅大星。八月。太白犯軒轅左角。十二年四月辛酉。太白犯火。七月。太白犯左角。十五年九月乙丑。太白犯斗第四星。十七年二月丁丑。太白犯井。辛丑。又犯鬼。肅宗熙平元年三月丙子。太白犯歲星。孝明帝神龜十二年八月己亥。太白犯軒轅。是月月又犯之。興和二年四月己丑。太白與木相犯。下奎。十一月甲戌。太白在氐。與填星相犯于氐。氐。鄭地也。武定四年九月壬寅。太白在左執法。東南三寸許。**北齊書**明帝紀。河清元年七月乙亥。太白犯輿鬼。保定二年閏正月癸巳。太白入昴。七月乙亥。太白犯輿鬼。**唐書**天文志。高祖武德五年十二月甲戌。太白犯軒轅。八年冬。太白入南斗。斗主爵祿。**新唐書**

太宗貞觀三年六月三日太白入太微。犯右執法。六年太白犯東井北轅井京師分也。十六年五月太白犯畢左股。畢為邊將。十九年七月壬午太白犯太微。是夜月掩南斗。太白遂犯左執法。光芒相及箕斗間。高宗永徽元年九月甲午。太白犯心前星。二年六月己丑。太白入太微犯右執法。龍朔五年六月壬寅。太白入東井。上元元年八月乙酉。太白犯進賢儀鳳。二年八月辛亥。太白犯軒轅左角。角貴相也。武后聖曆元年五月庚午。太白犯天關。天關主邊事。中宗景龍二年三月二十七日。太白入羽林。睿宗景雲二年三月壬申。太白入羽林。玄宗先天元年八月十六日。太白襲月。開元二年七月己丑。太白犯輿鬼東南星。肅宗至德元年七月十四日。太白犯太微左執法。正元六年五月戊辰。太白與月并。間容一指。八年十月乙酉。太白犯太微左執法。二十一年正月己酉。太白犯昴。代宗永泰三年己卯。太白犯左執法。三月癸丑夜。太白去天衛八寸。癸酉夜。太白順行。去歲星二尺。八月庚午夜。太白犯左執法。相去一尺。五年六月庚戌。太白入東井。七年六月甲子。太白入羽林。七月己卯。太白入東井。留七日而出。十月癸卯。太白臨鎮星。丙午夜。太白臨進賢。十一月癸未。太白掩房。九年五月己酉。太白逼熒惑。乙未夜。太白入軒轅。十年

六月癸亥。太白臨東井。七月庚子。太白辰星順行在柳。十三年十一月癸丑。太白臨哭星。大曆三年九月己卯。太白犯左執法。五年四月庚戌。太白入東井。舊唐書代宗紀。大曆八年春正月己丑。夜。太白入太微。九年秋七月己卯。太白入東井。十二年十一月癸丑。太白臨哭星。德宗建中十一年七月。太白相繼熒惑。犯太微上將。十三年二月戊辰。太白入昴。二十一年正月己酉。太白犯昴。趙分也。貞元十三年二月戊辰。太白入昴。二十一年正月己酉。犯昴。憲宗元和元年十月。太白入南斗。十二月復犯之。斗。吳分也。二年正月癸丑。月犯太白于女虛。四月丙子。太白犯東井北轅。四年九月癸亥。太白犯南斗。六年六月丁亥。太白近右執法。九年七月。太白入南斗。十二年八月甲戌。太白犯左執法。十三年八月壬戌。太白順行近太微。十五年四月。太白犯昴。穆宗長慶元年二月八日夜。太白犯昴。東南五寸所。三月庚戌。太白犯五車東南七寸所。八月壬辰夜。太白去太微垣南第一星一尺所。九月乙巳。太白犯左執法。戊戌夜。太白順行入太微。去左執法星西北一尺所。乙巳夜。去左執法二寸所。辛亥月。去天關西北八寸。十月乙丑夜。太白去南斗魁第四星西一寸所。二年十二月甲寅。月犯太白于南斗。四年正月二十二日。穆宗崩。敬宗即位。二月癸卯。太

白犯東井。近北軒轅。三月庚午太白犯東井北轅。遂入井中。晝見經天。七月而出。因犯輿鬼。京師分也。八月己丑太白犯軒轅右角。敬宗寶曆元年七月癸未。太白犯南斗。丙戌犯畢。九月癸未。太白犯南斗。十月辛亥犯天囷。二年六月太白犯昴。九年八月二日太白犯太微。文宗太和三年二月乙卯。太白犯昴。七年九月癸酉。太白入南斗。開成元年正月甲辰。太白掩西建第一星。二年二月己亥。月掩太白于昴。五月十二日犯畢。六月甲寅。太白亦有暈。庚申。太白入于東井。七月壬申入南斗。丁亥。月掩太白于柳。八月壬子。太白入太微。遂犯左右執法。十月二十五日。太白犯房。三年五月辛酉。太白犯輿鬼。甲寅。太白犯右執法。六月一日。太白犯熒惑。二十八日。犯右執法。十月辛卯。太白犯南斗。四年四月。太白歲星入輿鬼。武宗會昌元年十二月庚午。月犯太白于羽林。二年壬戌。掩太白于羽林。六月丙寅。太白犯東井。三年十月壬午。晝月食太白于亢。四年五月戊午。太白犯鎮。五年二月五日。太白掩昴。北側在昴宿一度。五月辛酉。太白入畢口。距星東南一尺。八月七日。太白犯軒轅大星。昭宗光化三年八月壬申。太白應見。在氐不見。至九月丁亥乃見。是謂當出不出。十一月丁未。太白犯月。因晝見。天復三年十一月丙戌。太白在南斗去地五尺許。

色小而黃。至明年正月乃高十丈。光芒甚大。是冬熒惑徘徊于東井間。久而不去。京師分也。天祐元年六月甲午。太白在張。芒角甚大。五代史後唐明宗天成元年四月庚戌。太白犯積尸。八月癸卯。犯心大星。二年八月庚戌。犯左執法。乙未。犯填星。長興元年六月乙卯。犯天鱗。二年正月。犯羽林。十一月丙戌。犯鍵。三年六月甲戌。犯右執法。九月庚寅。犯哭星。辛丑。犯右執法。十一月己亥。犯壘壁。十二月己酉。金星入羽林。清泰元年五月戊辰。金星犯上將。六月甲戌。金星犯右執法。三年九月甲辰。金星犯心。是夕二大星墜。光芒相屬。食頃方滅。晉高祖天福四年四月辛巳。太白犯東井北轅。甲午。犯五諸侯。五月。犯輿鬼中星。六年八月辛卯。犯軒轅。齊帝開運元年二月壬戌。太白犯昴。四月。犯五諸侯。丁巳。犯五諸侯。十二月癸丑。犯辰。二年九月甲寅。太白犯南斗魁。十一月。犯哭星。漢高帝天福十二年十月己丑。太白犯亢。距星。乾祐二年九月壬寅。太白犯右執法。庚戌。犯填于卯。犯歲填。自元年八月己丑。入太微垣。犯上將。執法內屏。謁者。句已往來。至是歲十一月辛亥而出。凡四百四十三日。是月辛酉。犯木。三年八月。犯房。庚戌。犯心大星。周太祖廣順二年九月庚辰。太白掩右執法。十月。犯進賢。宋史天文志。太祖建隆元年正月甲子。太白犯熒惑于

婁。十月太白犯于軫。二年九月丁丑太白犯南斗。乾德三年八月庚申犯太微上將。四年六月辛丑犯右執法。甲辰太白犯熒惑於張。五年八月辛酉又犯。開寶元年十一月庚寅太白犯房。四年四月己巳犯東井。十月甲辰犯熒惑于牽牛。五年十一月己未犯哭星。太宗太平興國六年八月戊子太白入太微。犯右執法。雍熙元年二月壬辰太白犯昴。八月壬寅掩軒轅第一星。十一月戊戌入氐。戊午又犯心前星。己未又犯太星。二年閏九月癸未入南斗魁。四年十月癸卯犯進賢。端拱元年十月辛巳犯哭星。癸未犯天壘。二年五月己亥犯畢右股第一星。六月乙卯犯天關。七月壬申犯輿鬼。東南星。八月壬子犯軒轅大星。九月庚辰犯左執法。淳化元年六月庚申犯太微垣入端門。二年三月癸丑犯歲星于婁。三年九月辛丑犯右執法。癸卯犯太微端門。十月壬午入氐。四年十月乙丑犯南斗魁第二星。五年六月丙午太白歲星相犯于柳。十月丙子犯辰星于虛。至道元年三月癸巳。凌東井第一星。五月壬戌犯軒轅大星。相去一尺許。十一月庚戌入氐。三年八月戊申犯太微上將。真宗咸平元年二月甲寅太白犯填星。七月癸酉犯角左星。八月犯軒轅。九月癸亥犯南斗魁。庚辰犯太微次將。十一月癸酉又入軒轅。乙亥入太微。二年正月己卯

入南斗魁。四月己未入太微。犯次將守屏星。甲子又入。六月丁丑入東井。三年二月甲寅犯昴。八月己未犯軒轅大星。九月壬午犯右執法。四年九月乙亥犯房心。十月丙午入南斗。閏十二月丙戌犯角大星。己丑犯房。辛卯犯箕。壬辰犯南斗魁。五年正月丁巳犯心後星。二月庚申掩昴。壬申掩五車。六年正月庚戌太白犯填星。四月庚辰犯輿鬼。五月乙巳犯軒轅。九月戊申犯左執法。十一月癸巳入氐。景德元年閏九月丙寅犯南斗。十月丙午犯哭星。二年五月己未掩心前星。六月己亥太白犯歲星。己丑犯南斗。七月甲寅犯輿鬼積尸。八月己丑犯太微上相。三年七月己酉犯歲星。十一月甲子犯西咸。大中祥符元年七月丁卯犯水位。庚辰犯輿鬼。丁亥犯耀。八月辛丑犯軒轅大星。丁未犯軒轅少民。九月壬申太白犯填星。二年八月壬寅入氐。九月戊午在心。戊辰犯天江。三年正月戊辰犯牽牛。四年四月甲子犯輿鬼。五月戊子犯軒轅大星。丙申犯軒轅少民。九月己丑犯右執法。乙未犯左執法。十月戊申在進賢西南。十一月庚午太白犯填星。丁亥犯房上相。十二月壬戌犯建星。五年十月戊申犯箕。十一月甲辰犯壁壘陣。六年正月丁酉犯右更。五月戊午犯天關。六月乙丑犯罰星。辛未犯東井。己卯犯天躔。七月乙未犯輿鬼。甲寅犯軒轅大星。八月犯

建。丁丑掩畢。又犯右執法。七年四月甲子犯東井。六月甲子犯太微上將。辛未犯執法。七月丁酉犯角南星。十一月戊子入氐。九年二月己卯犯昴。甲辰犯五車。八月癸未犯軒轅大星。己丑犯軒轅東南丙申在靈臺南。相去一尺。九月丙午犯右執法。壬子犯左執法。天禧元年四月壬辰。太白犯歲星。七月戊戌犯右執法。八月甲午犯房次相。十月己巳入南斗。二年犯亢。十一月乙卯入氐。四年七月丁巳掩房。己未犯箕。庚申入南斗魁。辛未犯昴。八月乙酉犯心後星。丁亥入南斗魁。戊戌犯昴。庚子掩五車。五年六月甲寅入東井。七月戊寅犯輿鬼。壬午犯五諸侯箕。丙申犯軒轅大星。八月壬子犯太微上相。戊午犯右執法。九月庚子太白犯歲星。乾熙元年五月庚午犯鬼及積尸。七月己卯犯角。仁宗天聖元年正月庚午犯建。二年二月丙戌犯五車。八月庚午犯軒轅東星。甲申自右掖門行入太微。辛巳犯太微上將。九月戊子犯右執法。甲午犯左執法。戊申太白犯熒惑。三年五月癸未太白辰星相犯于井。六月己卯犯太微上將。十月乙卯犯南斗。五年九月辛丑犯靈臺。乙巳犯明堂。庚申犯左執法。七年五月己巳犯畢距星。辛未犯填星在畢宿一度半。八年四月辛亥犯輿鬼。六月乙

酉犯熒惑。明道元年二月庚午犯五車。六月乙丑犯東井。八月壬子掩軒轅左角。九月丙子犯左執法。二年八月戊午犯房。十月癸巳犯南斗。十一月癸亥又犯氐。景祐元年閏六月庚辰太白犯填星。二年三月壬寅犯東井。四月乙卯犯五諸侯。己巳入鬼。五月丁亥犯填星。九月甲午犯右執法。十一月甲寅犯熒惑。甲申入氐。四年六月癸酉犯東井。七月辛丑犯鬼。己未犯軒轅大星。辛未犯熒惑。寶元元年四月己巳犯東井。癸巳犯輿鬼。七月甲辰犯角南星。康定元年正月乙酉犯昴。六月丁未犯東井。慶曆元年八月乙卯太白犯房。相去九寸。九月癸未犯南斗。十月癸亥臨哭星。二年六月庚申太白犯昴。八月甲辰夜去太微八寸所。三年五月己卯犯軒轅大星。九月甲申犯左執法。乙酉犯歲星。五年六月辛酉犯東井。六年七月丙戌犯左執法。八年閏正月丙寅犯昴。二月丁酉犯五車東南星。六月庚辰犯東井。八月庚午犯軒轅大星。皇祐元年九月戊午犯斗天相。四年十月丙子犯南斗。五年六月癸酉犯畢。乙未犯井鉞。至和二年三月壬午犯五車。四月辛巳犯畢。七月癸未犯輿鬼。八月庚申犯軒轅大星。九月庚辰犯太微左執法。嘉祐元年九月乙巳太白犯歲星。十月丁巳入氐。戊辰犯房。二年九月庚子犯南斗。四年八月甲子犯軒轅右角。

九月丁未犯太微左執法。十月癸酉犯亢。癸未入氐。十月庚子犯罰南星。  
癸卯犯東咸。十二月辛未犯建。五年正月壬辰太白犯歲星。九月庚寅犯  
房。乙巳犯天江。十一月戊戌犯壁壘陣。丁未退犯井鉞。六年六月乙卯犯  
畢距星。七月甲申犯東井。己丑犯填星。躔井十二度。庚寅犯天樽。甲辰犯  
輿鬼距星。八月己亥太白犯辰星。在軫四度。甲子犯軒轅大星。戊午犯靈  
臺北星。七年正月庚申太白犯歲星。在營室。三月癸酉入東井。六月丁丑  
太白犯熒惑。在翼一度半。十一月乙巳入氐。己未犯西咸南星。癸亥犯罰。  
八年四月己丑太白犯歲星。在胃。英宗治平元年二月辛卯犯昴。閏五  
月丙寅入畢不犯。六月甲子犯東井。七月壬申犯輿鬼。癸巳犯軒轅大星。  
八月己酉犯靈臺。甲寅入太微。丙寅犯右執法。十月丙申入氐。壬子犯心  
前星。二年四月丁巳太白犯歲星。五月戊子犯填星。在張五度。八月乙未  
犯氐。己酉入太微。庚戌犯右執法。九月壬午犯斗距星。十月庚寅入氐。丙  
午犯心距星。三年十二月癸卯太白犯熒惑。躔危四度。四年閏三月庚寅  
犯東井東第一星。癸卯犯五諸侯東第一星。四月丁巳犯輿鬼東北星。八  
月丁未犯軒轅太民。甲寅犯軒轅女御。庚午犯靈臺。九月癸巳太白犯填  
星。丙申犯歲星。辛巳犯右執法。壬午掩之。戊子入太微。十月乙卯犯亢。丙

寅入氐。十一月丁丑犯房。己卯犯鍵閉。丁酉犯天江。十二月丁卯犯熒惑。  
神宗熙寧元年八月己未入氐。十一月辛巳犯壁壘陣西第二星。己丑  
太白犯熒惑。二年六月辛亥犯天關。庚申犯東井距星。辛酉入東井。七月  
辛未犯天樽。犯輿鬼東南星。八月丙午犯軒轅大星。三年五月壬子犯靈  
臺。六月乙丑犯右執法。十月癸酉犯亢距星。乙酉犯填星。十一月庚寅入  
氐。丁未犯罰。四年十一月辛丑犯十二國代星。庚戌犯壁壘陣西第五星。  
五年二月甲戌犯昴東北第二星。六月己酉犯畢距星。七月丁亥入東井。  
十月戊寅入氐。十一月己酉犯罰。六年六月癸未犯東上相。丁酉犯左執  
法。八月丁丑掩氐東南星。九月甲辰犯天江。南第二星。丙寅犯南斗距星。  
丁卯入南斗。七年二月乙未犯壁壘陣西第七星。八年二月庚寅犯天陰  
中星。三月戊戌犯月星。癸卯犯天街北星。辛酉犯司恠北第二星。閏四月  
戊戌犯輿鬼西北星。八月庚寅犯填星。丁酉犯軒轅御女。九月癸亥犯右  
執法。辛未犯左執法。十月丁酉犯亢距星。丙午入氐。九年九月丁巳犯東  
咸西第一星。辛巳犯南斗西第二星。十月庚寅犯狗國西北星。十一月辛  
酉犯壁壘陣西北星。十年六月壬寅犯東井距星。癸卯入東井。七月癸酉  
太白犯歲星。九月己酉入太微。元豐元年十月丙辰犯亢距星。庚午入

氏十一月己丑犯蜀南第二星。十二月壬戌犯建西第二星。二年十一月  
壬辰犯壁壘陣西第五星。十二月戊戌又犯壁壘陣。三年正月甲戌犯外  
屏西第二星。二月甲寅犯昴距星。六月癸巳犯畢距第二星。乙未入畢口。  
七月戊辰犯東井西北第二星。己巳入東井。戊子犯水位西第三星。八月  
丙申犯輿鬼。九月戊寅入太微。乙酉犯左執法。閏九月丙申犯進賢。丁巳  
犯氐距星。十月己未入氐。四月八月甲戌犯心距星。九月戊申犯南斗距  
星。庚戌入南斗。五年三月丙戌太白犯填星。六年二月壬申犯天陰東北  
星。三月癸未犯司恠北第二星。四月丁卯犯五諸侯。八月己卯犯軒轅御  
女。九月乙巳犯右執法。丁巳犯東上相。甲子犯進賢。十月戊寅犯亢距星。  
戊子入氐。七年十一月己酉犯壁壘陣西第五星。甲寅犯歲星。十二月辛  
巳犯雲雨。八年六月甲戌順行犯天關。癸未順行犯井距星。甲申順行入  
井。七月乙未犯天罇。八月甲戌犯軒轅少民。辛巳犯靈臺。昭宗元祐元  
年閏二月丙辰犯諸王。戊申犯熒惑。十月戊戌犯亢。壬子入氐。二年十二  
月己丑犯壁壘陣。三年二月己亥犯昴。六月癸未犯天高。七月辛亥入東  
井。壬戌犯天罇。庚午犯水位。八月丁丑犯鬼。戊戌犯軒轅大星。九月甲寅  
犯太微垣上將。庚申入太微犯右執法。丁卯犯左執法。十月丁未犯亢南

第一星。十一月甲辰入氐。丁巳犯罰。四年六月丙午犯太微垣上將。戊申  
入太微。九月壬辰入斗。五年正月丁亥犯羅堰。十一月戊戌犯壁壘陣。六年  
正月乙酉犯外屏。二月甲寅犯天陰。三月癸酉犯平道。丁丑犯天江。四月  
己酉犯五諸侯。閏八月辛酉犯軒轅御女。丁卯犯軒轅左角。九月丁亥犯  
右執法。己丑入太微。十月庚午入氐。十一月丙戌犯罰。七年八月丙寅入  
氐。己巳犯月星。辛未犯司恠。丁丑犯房。又犯鉤鈴。十月庚戌犯南斗。十一  
月庚辰犯代。甲申犯壁壘陣。十二月壬戌犯雲雨。八年六月乙酉犯諸王  
東第二星。丙辰犯天關。丙寅入東井。庚午犯東井。八月庚戌犯軒轅大星。  
甲戌入太微。八年四月乙卯太白犯熒惑。紹聖元年五月戊午犯靈臺  
北第一星。十月甲午入氐。十一月丙午犯西咸南第一星。癸丑犯蜀南第  
二星。二年正月乙巳犯羅堰南第一星。十一月辛亥犯壁壘陣西星。庚申  
犯壁壘陣西第六星。三年二月庚戌犯昴。庚辰入昴。五月戊午犯畢。六月  
庚申又入。戊辰入犯天高。庚辰犯天關。丙戌犯司恠。七月壬辰犯東井。癸  
巳入東井。八月庚申犯輿鬼。犯軒轅大星。九月乙酉犯軒轅左角。丙午太  
白犯填星。乙未犯太微上將。己亥入太微垣。行軌道。己酉犯太微左執法。  
甲寅犯太微上相。癸未入氐。十一月辛丑犯東咸。四年四月壬寅犯五諸



侯西第五星。五月己卯犯長垣南第一星。六月乙酉犯靈臺北第一星。丁亥犯太微垣西上將星。戊子入太微。壬寅犯太微左執法。八月太白犯天江。壬午犯底東南星。壬辰犯房南第三星。庚子犯心大星。己酉犯天江南第一星。十二月戊申入建。元符元年正月庚戌犯建。丙辰犯天鷄。己巳犯羅堰。二月乙未犯壁壘陣。十二月乙亥犯代星。己亥犯壁壘陣。乙未犯熒惑。二年正月己酉犯壁壘陣東北星。二月乙未犯天陰東南星。三月甲辰犯月星。庚戌犯諸王西東一星。丁卯犯司恠北第二星。四月辛卯犯五諸侯西第五星。五月乙巳入犯鬼西北星。九月癸卯犯軒轅御女。丁巳犯靈臺南第二星。戊辰入太微。己巳犯太微右執法。閏九月丙子犯左執法。十月乙巳太白犯填星。壬子入氐。壬戌犯西咸南第一星。戊辰犯罰星南第一星。十二月己亥犯建西第二星。三年七月己巳犯角南星。八月丙申犯亢南第一星。九月丁亥犯南斗西第二星。徽宗建中靖國元年四月丁酉犯外屏西第二星。六月辛亥入東井。崇寧元年三月壬申犯月星。四月戊戌犯井鉞。六月庚辰犯進賢。十月甲戌犯亢距星。十一月壬寅太白犯填星。二年正月乙巳犯壁壘陣西第五星。八月丙子入氐。九月戊子犯房鉤鈴。三年二月癸亥犯昴距星。七月戊戌犯積薪。八月壬寅犯鬼積

尸氣。十一月庚寅太白犯辰星。四年五月甲寅犯軒轅大星。八月庚辰犯罰。十二月庚寅犯建西三星。五年正月丁未犯靈臺犯牛東南星。大觀元年正月丁未犯外屏。二月丙戌犯月星。三月庚寅犯大街。壬辰犯畢。四月戊午入井。十月辛酉犯左執法。丙子犯角大星。閏十月丙戌犯亢。丁未犯房。十一月壬子犯心。十二月乙酉太白犯熒惑。二年正月甲寅太白犯歲星。十月丁酉犯填星。十一月壬申犯歲星。三年七月丁丑犯亢。八月丙戌入氐。庚子犯房鉤鈴。三年二月癸卯犯壁壘陣。三月辛未犯歲星。五月辛亥犯天陰。六月壬辰入井。四年四月己卯犯井鉞。庚辰犯井。辛巳入井。十月戊午入氐。十一月庚寅犯天江。政和元年二月辛丑太白犯填星。十一月甲戌犯天江。三年六月戊午入太微垣犯右執法。四年十二月乙卯入羽林軍。五年三月辛未犯天街。四月乙卯犯五諸侯。十一月壬辰犯罰。六年九月庚戌犯南斗。十一月庚寅犯壁壘陣。七年八月癸酉入太微。重和元年六月庚午犯上將。十一月壬申犯天江。宣和二年五月丁丑犯天陰。十月己卯犯熒惑。三年八月己亥犯鉤鈴。十月丁未入井。四年二月辛丑犯壁壘陣。五年五月甲寅犯鬼。十一月庚午犯房。六年七月庚子犯亢。七年五月壬辰犯畢。七月乙未犯歲星。欽宗靖康元年四月丁未。

犯井東扇北第一星。五月壬申入鬼犯積尸氣。六月辛丑犯歲星。十一月庚午犯亢。壬午入氐。閏十一月戊戌犯鍵閉。高宗建炎三年七月辛巳入太微。閏八月丙戌犯心前星。四年正月癸亥犯建星。紹興元年九月丁酉犯軒轅左角。乙卯入太微。丙辰犯右執法。癸亥復犯。十一月戊辰入太微。己丑犯亢南第二星。己亥入氐。二年九月庚申犯天江。三年六月甲午入井。八月乙酉犯軒轅左角少民星。四年四月庚辰犯司帷。五月辛亥犯輿鬼。十一月甲子入氐。五年正月乙卯犯建。十一月己丑犯壁壘陣。庚寅入羽林。六年五月辛卯犯畢。六月辛酉入井。七月己巳復犯井東北第二星。己卯犯水位。八月戊申犯軒轅大星。九月戊辰順行入太微垣。乙酉始出。丁亥犯進賢。十月辛丑入亢。己酉入氐。辛亥又入氐。七年五月辛巳犯鬼宿西北。六月丙辰犯太微垣西上將。八年十二月戊午入羽林軍。乙亥經行壁壘陣。入羽林軍。九年二月壬申犯月星。四月癸亥犯五諸侯。西第五星。五月甲申入鬼犯積尸氣。九月乙巳入太微垣犯左執法。丁未始出。十年四月丙子入氐。十一年六月乙亥犯井距星。十二年五月甲午犯鬼西北星。乙未犯積尸氣。十七年四月丙午順行犯五諸侯。九月己卯順行入太微垣。庚辰順行犯右執法。十一月乙丑順行入氐。十九年六月乙

卯犯井鉞。壬戌犯填星。丙辰犯東井。丁巳入東井。二十一年十一月己酉順行入羽林軍。二十二年六月甲申犯東井。乙酉入東井。七月辛亥順行入鬼。犯積尸氣。九月壬辰順行入太微垣。庚子犯左執法。十月甲戌入氐。二十三年八月辛酉順行犯亢。二十五年四月戊子順行犯五諸侯。八月癸卯順行犯權左角少民。十月癸卯順行入氐。二十六年七月壬戌順行犯太微左執法。癸亥犯熒惑。八月丁亥順行犯亢距星。戊戌順行入氐。九月乙丑順行犯天江。十月甲申順行犯南斗。閏十月辛酉順行犯壁壘陣。二十七年四月壬寅犯歲星。六月丙申順行犯井鉞。己亥甲辰皆入東井。七月戊子順行犯權左角少民星。二十八年三月甲申犯司帷。十一月庚午順行入氐。二十九年十一月癸未順行犯壁壘陣。西勝星。戊戌順行入羽林軍。三十年六月丙辰順行犯天關。壬申入東井。己亥犯歲星。八月癸丑順行犯權大星。丁巳犯權左角少民星。十月庚申順行入氐。三十一年六月戊辰掩犯太微右執法。七月壬辰順行犯角宿距星。三十二年正月丁亥順行犯建。二月己亥順行犯牛。孝宗隆興元年六月丙子入東井。八月乙酉犯權左角少民星。九月丁酉犯熒惑。辛丑入太微。庚戌犯左執法。入守垣內。壬子始出。十月辛酉順行犯進賢。十一月戊戌犯房。庚子犯

鍵開。十二月庚申順行犯天籙。甲子犯填星。辛未犯建。二年八月庚辰順行入氐。辛巳犯氐。十月己卯犯天籙。丙寅順行犯南斗。己巳順行犯狗。十一月甲申順行入天田。甲辰順行犯壁壘陣。乾道元年五月戊午順行犯諸王。六月辛巳入東井。丁未順行犯鬼。八月癸未入太微。十二月庚子順行入羽林軍。二年三月己酉順行犯天街。己亥順行入鬼。九月己酉犯明堂。十一月辛亥順行入氐。十二月壬辰順行犯南斗。三年十一月乙亥犯歲星。丁丑犯羽林軍。四年五月己卯犯畢。辛巳入畢口內。六月丁酉犯天關。癸卯犯司帷。辛亥入東井。七月庚申犯天籙。甲戌犯鬼。八月己亥犯權。丙辰入太微。九月丙寅出。十月丁酉入氐。五年九月庚申犯心宿大星。七年八月丁卯犯權左角少民星。九月甲申犯右執法。入太微垣。甲午出。十月丁卯入氐。十一月己卯犯房。丙戌犯東咸。八年五月癸巳犯歲星。八月壬戌入氐。甲子犯氐東南星。九月癸酉犯房。甲戌犯鈞鈴。戊子犯天江。十一月丁亥犯壁壘陣。九年七月丁巳犯熒惑。淳熙元年十一月甲午入氐。辛亥犯罰。十二月壬午犯建。二年閏九月丁巳犯熒惑。十一月丁卯入羽林軍。三年五月癸亥犯畢。六月己卯犯天關。丁亥犯井鉞。辛卯入東井。八月戊戌入太微。犯右執法。四年七月乙卯犯角宿距星。九月辛丑犯

心前星。六年六月乙未入東井。八月癸卯犯權御女星。十月戊申入氐。七年八月乙巳入氐。八年五月甲辰入東井。七月丁丑犯填星。九年十一月乙亥入氐。十年閏十一月己亥犯壁壘陣。十一年七月庚戌犯歲星。壬申入東井。八月丁巳犯權大星。十二年六月癸酉犯太微右執法。十四年六月甲戌入井。九月丁未入太微。戊申順行犯太微右執法。丙寅犯進賢。十五年九月丙申犯房。十月辛未犯南斗魁。十六年閏五月丙戌入井。光宗紹熙元年十一月戊午入氐。二年十二月戊子犯歲星。三年七月己卯犯天江。八月甲辰犯權左角少民星。四年九月甲戌犯心東星。寧宗慶元元年六月丁卯入東井。九月戊子入太微。戊戌始出。嘉泰三年六月甲寅入井。十月甲寅入氐。四年六月乙未犯斗。開禧元年六月壬子入井。二年五月辛卯犯權大星。十一月壬午入氐。三年十月丁未太白犯熒惑。十一月癸巳順行入壁壘陣。嘉定元年六月甲戌犯井鉞。四年六月庚子入井。八月庚寅犯權大星。七年十一月丙寅順行入氐。十年七月乙酉犯角。十二年六月庚辰順行入井。八月壬申順行犯權星御女。丁丑犯權左角少民星。十三年十月丁巳順行犯南斗。十五年十一月丙午順行入氐。宿方口內。理宗紹定五年七月甲申順行入井。瑞平二年七月

丙午順行入井。八月丁巳犯太微右執法。嘉熙二年十月戊辰順行入井。四年六月己亥順行犯畢距星。癸丑犯天關。七月乙丑順行入井。八月己酉順行犯權大星。淳祐元年十月庚辰順行入井。三年閏八月丁丑順行犯權大星。十月丙戌順行入井。四年九月癸亥順行犯斗。六年五月壬戌順行犯權大星。十月己酉順行入井。八年七月戊申入井。九年七月癸酉犯進賢。十月辛丑。十一月辛未。順行入井。十一年二月甲寅順行犯昴。七月壬申順行入井。閏十月癸亥順行入井。十二年九月丙午。順行犯斗宿距星。寶祐四年六月丁亥順行入井。開慶元年七月辛亥。順行入井。八月庚子順行犯權。九月戊子犯熒惑。四年十月壬午犯歲星。五年十月二月辛未犯填星。景定元年八月壬子犯房。三年十月庚午順行入井。五年六月戊午。順行犯天關。己巳與太陰並行入井。度宗咸淳四年七月庚午。順行干斗。幼主德祐元年七月丙子入東井。十一月辛巳犯房。遼史聖宗統和十二年六月。太白犯歲星。道宗大安二年二月。太白犯歲星。金史熙宗天眷三年九月辛巳。太白犯軒轅左星。乙巳犯左執法。十一月戊寅。太白入井。海陵天德四年六月癸巳。太白犯東井第二星。八月辛未。犯軒轅大星。世宗大定八年八月甲午。太白犯軒轅大星。十六

年八月丙子。太白犯軒轅大星。十九年八月癸卯。太白犯軒轅御女。二十年十一月乙亥。太白入井。癸未出井。中。二十五年三月乙酉。太白與月相犯。二十七年十月己丑。太白入井。章宗太和五年十一月壬午。太白入井。哀宗正大元年四月乙未。太白辰星相犯。四年六月丙辰。太白入井。元史世祖中統二年八月丙午。太白犯歲星。三年十一月乙酉。太白犯鉤鈴。至元四年八月壬午。太白犯軒轅大星。七年十月庚午。太白犯右執法。九年五月乙酉。太白犯畢距星。十二年七月癸酉。太白犯井。九月己巳。太白犯少民。己卯犯太微西垣上將。十三年九月辛亥。太白犯南斗。甲寅。太白入南斗。二十年二月庚子。是夜太白犯昴。壬寅。太白犯昴。七月丙辰。太白犯井。癸亥。太白犯井。八月丙午。太白犯軒轅。九月壬子。太白犯軒轅少女。己巳。太白犯右執法。甲戌。犯左執法。十一月戊寅。太白歲星相犯。二十一年七月甲申。太白犯熒惑。九月癸巳。太白犯南斗。二十三年六月丙申朔。太白犯御女。八月乙卯。太白犯軒轅右角星。冬十月甲午朔。太白犯右執法。壬寅。犯左執法。甲寅。犯進賢。十一月戊辰。犯亢。十二月戊戌。犯東咸。二十四年八月癸亥。太白犯亢。甲申。太白犯房。九月庚子。犯天江。十月壬子。犯南斗。十一月壬辰。太白犯壘壁陣。二十五年五月戊申。太白犯

畢。六月甲戌太白犯井。七月庚子太白犯鬼。八月己未犯軒轅大星。二十六年五月壬辰太白犯鬼。二十七年正月庚戌太白犯牛。十月辛巳太白犯牛。二十八年二月甲申太白犯昴。三月乙卯太白犯五車。七月己亥太白犯井。八月丙寅太白犯輿鬼。戊子犯軒轅大星。并犯歲星。九月戊午犯熒惑。二十九年六月己丑太白犯歲星。八月己亥太白犯房。九月辛巳太白犯南斗。三十年二月癸丑太白犯壘壁陣。四月癸丑犯墳星。三十一年四月戊申太白犯鬼。五月庚戌朔犯輿鬼。八月戊戌犯軒轅。九月乙亥犯右執法。十月壬午犯左執法。十一月癸酉犯房。成宗元貞二年六月乙巳犯天關。丁巳犯墳星。七月壬午犯輿鬼。八月庚子犯軒轅。乙卯犯上將。九月戊辰犯左執法。大德元年五月癸酉太白犯鬼積尸氣。閏十二月太白犯建星。丙子又犯建星。二年十月壬戌太白犯牽牛。十二月乙丑犯歲星。三年五月己亥犯畢。七月己卯朔犯井。八月丁巳犯軒轅。九月丁酉犯左執法。十一月乙酉犯房。四年五月辛丑太白犯輿鬼。六月丁巳犯墳星。九月戊午犯斗。甲子又犯斗。五年五月丁卯太白犯井。六月己酉犯輿鬼。甲午犯輿鬼。六年四月乙丑朔太白犯東井。八月壬午犯軒轅。九月丁巳犯右執法。七年八月癸巳太白犯氐。九月乙亥犯南斗。九年四月壬辰

太白犯井。九年冬十二月丙子太白犯西咸。十年正月丁巳太白犯建星。閏正月癸酉犯牽牛。己丑犯壘壁陣。十月甲辰犯斗。十一年九月癸酉犯右執法。己卯犯左執法。十月乙巳犯亢。十一月丁卯犯房。武宗至大元年五月癸未太白犯輿鬼。七月壬申犯左執法。十月辛丑犯南斗。十二月戊寅掩建星。二年六月乙卯太白犯井。十二月辛未犯壘壁陣。三年三月丁未太白犯井。八月甲子犯軒轅太民。十月丙午犯左執法。十一月甲戌朔犯亢。十二月辛酉犯墳星。丙寅犯氐。四年十月丙申太白犯壘壁陣。仁宗皇慶元年八月戊辰犯軒轅。乙酉犯右執法。九月丁巳犯亢。延祐六年七月丙子太白犯太微垣右執法。八月乙亥犯東咸。七年四月甲寅太白犯墳星。六月丁卯犯井宿東扇第三星。八月丙辰犯靈臺上星。丁卯犯太微垣右執法。九月己亥犯亢星。英宗至治元年二月辛酉太白犯熒惑。五月戊寅犯鬼宿積尸氣。十一月己亥犯西咸南第一星。二年正月庚辰太白犯建星西第二星。辛巳犯建星西第三星。丁酉犯牛宿南第一星。二月壬子犯壘壁陣西方第二星。壬戌犯壘壁陣第六星。十一月甲辰犯壘壁陣第一星。十二月戊寅犯歲星。三年五月庚戌犯畢宿右股第三星。十月己巳犯亢。丙子犯氐。十一月庚寅犯鉤鈐。乙未犯東咸。泰定帝泰

定元年五月丙午。太白犯鬼宿。丁未又犯鬼宿積尸氣。十月丙寅犯斗宿  
距星。己巳入斗宿魁。庚午犯斗。二年五月壬寅太白犯建星。十二月甲午  
犯壘壁陣。三年正月辛酉。太白犯外屏。四月戊戌犯鬼宿。九月壬戌犯太  
微右執法。十月辛巳犯進賢。四年正月己酉。太白犯牛宿。九月壬子犯房  
宿。十一月癸酉犯壘壁陣。致和元年七月丙戌。犯軒轅大星。文宗天  
曆元年九月庚辰。太白犯亢宿。二年正月甲子。太白犯壘壁陣。五月庚申  
犯鬼宿積尸氣。六月丙午。永平起田府所隸昌國諸屯。大風驟雨。平地出  
水。至順元年八月戊辰。太白犯氐宿。十一月丙戌。犯壘壁陣。二年五月  
甲午犯畢宿。六月丁卯犯井。八月乙卯犯軒轅大星。庚申犯軒轅左角。九  
月丙子犯填星。十一月壬申朔。太白犯鉤鈴。順帝元統元年十一月乙  
亥。太白犯壘壁陣西第八星。二年四月壬午夜。犯鬼宿積尸氣。八月己卯  
夜。太白犯軒轅御女星。九月癸巳犯靈臺中星。乙巳犯太微垣右執法。壬  
子犯太微垣左執法。十月癸亥犯進賢。乙亥犯填星。仍改至元元年十月  
丁卯。太白犯斗宿魁第三星。十二月辛酉。犯壘壁陣東方第六星。二年六  
月戊子犯井宿東扇北第二星。七月己酉。犯鬼宿東南星。乙卯犯熒惑。三  
年五月壬子。犯鬼宿東北星。六月乙亥。犯靈臺上星。己卯夜。犯太微西垣

上將。丁亥犯太微垣右執法。十一月戊戌犯亢宿距星。甲戌犯東咸上星。  
四年正月癸卯。太白犯建星西第二星。甲辰又犯建星西第三星。庚申犯  
牛宿。九月戊申犯東咸上第二星。十二月乙卯。犯外屏西第二星。五年五  
月丙子。太白犯畢宿右股西第三星。八月丁酉。犯軒轅大星。六年三月戊  
寅。太白犯月星。六月辛亥夜。犯歲星。又太白歲星昏犯右執法。十月丁酉  
太白入南斗魁。己亥犯斗宿中央東星。至正元年十二月丁巳。犯壘壁  
陣東方第五星。三年七月庚辰。太白犯右執法。九年正月庚戌。太白犯建  
星東第三星。三月己亥。犯壘壁陣東方南第一星。十一月庚辰。犯壘壁陣  
西方第二星。十二月戊戌。犯壘壁陣東方第五星。十年四月丙午。太白犯  
鬼宿西北星。十一年七月壬戌。太白犯右執法。己巳犯太微垣左執法。九  
月丁巳。犯房宿第二星。十月乙酉。犯斗宿西第二星。辛卯犯斗宿西第四  
星。十二月庚辰夜。犯壘壁陣西第六星。丙戌夜。犯壘壁陣西第七星。十二  
年五月癸酉。犯填星。六月辛亥。犯井宿東第二星。八月丁卯。犯歲星。十三  
年二月庚戌。太白犯熒惑。四月辛丑。犯井宿東扇北第一星。十月癸亥。犯  
亢宿距星。十二月丁酉。犯東咸北第一星。十四年正月丁卯。太白犯建星  
西第二星。二月戊午。犯壘壁陣西第八星。十五年九月乙丑夜。犯太微垣

左執法。十六年五月癸巳太白犯鬼宿積尸氣。十七年七月癸未太白入犯鬼宿積尸氣。八月癸卯犯軒轅大星。十二月犯歲星。庚辰犯壘壁陣東方第五星。十八年三月丁卯太白在井宿失行於北生芒角。四月辛卯入犯鬼宿積尸氣。五月壬寅犯填星。十二月戊寅生黑芒。環繞太白。乍東乍西。乍動乍靜。癸未生黑芒。忽明忽暗。乍東乍西。十九年七月丁酉太白犯上將。甲辰犯右執法。己酉犯左執法。九月甲寅入犯天江南第一星。十月壬申入犯斗宿南第三星。十二月戊辰犯壘壁陣西方第七星。二十年六月癸巳太白犯井宿東扇北第二星。二十一年五月太白犯軒轅左角。二十二年正月戊申朔。太白犯建星西第二星。二月己卯犯壘壁陣西方第二星。二十三年六月乙卯犯井宿西扇北第二星。壬戌夜入犯井宿東扇南第二星。八月壬寅入犯軒轅大星。丁未犯軒轅左角。辛酉犯歲星。乙丑入犯右執法。九月辛未入犯左執法。丁亥犯填星。十月癸卯犯氐宿距星。戊午犯房宿北第一星。二十四年癸丑太白入犯井宿東扇北第一星。五月甲戌犯鬼宿西北星。乙亥又犯積尸氣。六月丁巳犯右執法。七月癸亥與歲星相合於翼宿。二星相去八寸餘。十月丙辰犯斗宿西第二星。二十五年正月甲戌犯建星西第四星。三月戊辰犯壘壁陣東方第五星。十月

壬申犯辰星。十一月己丑犯熒惑。二十六年四月丙子太白入犯鬼宿積尸氣。九月壬辰犯太微垣右執法。十一月乙酉犯填星。丁亥犯房宿北第一星。戊子犯鍵閉。太白晝見。東漢書安帝永初二年正月戊子。太白晝見。三年二月太白晝見。占為強臣。前志曰。太白晝見。強國弱。小國強。女主

昌。是時鄧氏方盛。五年六月辛丑。太白晝見經天。春秋漢合彙曰。陽弱。辰。太白經天。注云。陽弱。君柔。不堪鉤命。決曰。天失仁。太白經天。元初四年

正月乙未。太白晝見兩上。自永初五年。至永寧十年之中。太白晝見經天。再入輿鬼。一守畢。再犯左執法。入南斗犯鉞星。孝順。永建二年二月癸未。太白晝見三十九日。閏月乙酉。太白晝見東南。四十一日。五年閏月庚子。六年十月乙卯。太白晝見。永和三年三月壬子。六月丙午。八月乙卯。俱太白晝見。漢安二年正月。太白晝見。七月甲申。太白晝見。桓帝元嘉元年二月戊午。太白晝見。延熹六年十一月丁亥。太白晝見。是時鄧侯

家貴盛。九年七月丙戌。太白晝見經天。永康元年七月丙戌。太白晝見。魏志。魏文帝黃初四年六月甲申。太白晝見。五年十月乙卯。太白晝見。六年十一月丙寅。太白晝見南斗。太和六年十一月丙寅。太白晝見。青龍三年五月丁亥。太白晝見積三十餘日。四年三月己巳。太白與月俱加。

丙畫見。景初元年十月壬申太白在尾歷二百餘日恒畫見。晉史晉武帝太康六年十月乙未。七年五月俱太白畫見。惠帝元康六年十月乙未太白畫見。永康元年三月太白畫見。永寧元年五月太白畫見。成帝咸康四年己巳太白畫見。七年五月太白畫見。康帝建元二年四月乙酉太白畫見。穆帝永和元年五月辛巳太白畫見。八月太白畫見。南斗二年二月辛巳太白畫見。三月壬子太白畫見。六月丙午太白畫見。八月乙卯又畫見。十年七月庚午太白畫見。十二年六月庚子太白畫見。在東井。升平元年六月戊戌太白畫見。在軫。四年十二月丙辰太白畫見。簡文帝咸安二年六月太白畫見。在七星。孝武帝寧康二年十一月甲申太白畫見。在氐。兖州分野。太元元年八月癸酉太白畫見。在氐。兖州分野。二年九月太白畫見。三年九月壬午太白畫見。在角。兖州分野。六年九月丙子太白畫見。七年十一月太白畫見。在斗。八年四月甲申太白畫見。在參。九年七月丙戌十一月丁巳太白又畫見。十年四月乙亥太白畫見。於畢昴。十一年三月戊申見東井。六月甲申太白見于輿鬼。十二年六月癸卯太白畫見。在柳。十月庚午太白畫見。在斗。十三年正月丙戌太白又畫見。十四年四月己巳。六月辛卯。九月丙寅太白俱畫見。十

六年四月癸卯朔太白畫見。十七年七月丁丑太白畫見。十月丁酉又畫見。十八年六月又畫見。十九年五月又畫見。于柳。六月辛酉又畫見。于輿鬼。九月又見于軫。二十一年二月壬申太白畫見。三月癸卯太白連畫見。在羽林。三月太白畫見于胃。七月丁亥太白畫見。在太微。安帝隆安元年四月丁丑太白畫見。在東井。二年閏六月太白畫見。在羽林。五年正月太白畫見。自去年十二月太白在斗畫見。至是月。元興元年三月戊子。太白犯五諸侯。因畫見。義熙元年七月庚辰。太白畫見。在翼軫。三年正月丙子。太白畫見。在奎。五月己丑太白畫見。在參。六年六月甲午太白畫見。九年五月壬辰。太白犯右執法畫見。元熙元年七月己卯太白畫見。自義熙元年至是太白經天者九。宋書文帝元嘉六年五月太白畫見。經天。八月太白畫見。在翼。八年四月辛未太白畫見。在胃。十一年三月太白畫見。在參。閏三月戊寅犯五諸侯。十六年五月丁卯太白畫見。在胃。昴閏。十四年五月丙午太白畫見。在太微。二十二年七月太白畫見。二十四年四月太白畫見。二十五年正月太白畫見。經天。二十七年夏太白畫見。經天。二十八年五月太白畫見。二十九年正月太白畫見。經天。明年東宮弒逆。南齊書高帝建元二年六月丙子。太白畫見。四年二月丙戌太白畫見。



在午上。六年辛卯太白晝見午上。武帝永明二年正月戊戌太白晝見當午上。三年四月丁未太白晝見。癸亥太白晝見當午上。八月丁巳太白晝見當午上。四年九月壬辰太白晝見當午。五年五月丁酉太白晝見當午上。六年五月癸卯太白晝見當午上。己丑太白晝見當午。閏八月甲午太白晝見當午。八年正月丁未太白晝見當午上。九年六月丙子太白晝見當午上。十年九月己酉太白晝見當午上。十一年五月戊午太白晝見當午。名為經天。**梁書**帝紀。武帝天監五年春正月丁亥太白晝見。五月辛卯太白晝見。六年七月甲子太白晝見。普通四年十一月癸未太白晝見。六年五月己酉太白晝見。太清三年春正月乙酉太白晝見。**陳書**帝紀。孝元帝永聖二年九月癸未太白晝見。乙卯太白晝見。三年十二月丙戌太白晝見。文帝天嘉元年太白晝見。九月丙子太白晝見。四年六月癸巳太白晝見。六年秋七月丁酉太白晝見。臨海王光大元年夏四月乙卯太白晝見。二年夏四月辛巳太白晝見。九月戊午太白晝見。十一月戊子太白晝見。宣帝大建二年夏閏四月己酉太白晝見。三年夏五月戊申太白晝見。十年夏五月甲申太白晝見。後魏太祖天賜四年正月五月己丑太白俱晝見。太宗永興二年六月甲午太白晝見。世祖始

光二年太白晝見經天。神嘉二年五月太白晝見。四年四月辛未太白晝見。胃為趙分。己丑又晝見。延和三年三月丙辰太白晝見在參。魏邦戒也。太延五年五月晝見于胃昴入羽林。遂犯畢。太平真君十一年正月甲子太白晝見經天。四月又如之。**魏書**孝文大和元年九月丁亥太白晝見經天。光色尤盛。更姓之祥也。十一年五月丁酉太白晝見。十七年五月戊午太白晝見。九月又如之。是謂兵祥。雍州也。世宗正始三年六月丙辰太白晝見。延昌三年六月辛巳太白晝見。孝莊帝永安二年五月己亥太白在參晝見。孝武永熙二年四月太白晝見。四年四月庚午太白晝見。靜帝天平四年十一月太白晝見。元象元年七月太白在柳晝見。柳河南也。周武天和元年十月乙卯太白晝見。**隋書**帝紀開皇元年三月甲申太白晝見。乙酉又晝見。四月壬午太白晝見。三年十月癸未太白晝見。二十年十月太白晝見。**唐書**天文志高祖武德元年五月庚午太白晝見。二年九月庚寅太白晝見。九年五月己卯太白晝見。七月辛亥晝見。甲寅晝見。八月丁巳晝見。太宗貞觀十六年六月戊戌太白晝見。二十三年七月太白晝見。高宗永徽元年五月己未太白晝見。三年十二月乙未太白晝見。四年六月己丑太白晝見。龍朔元年六月辛巳

太白晝見經天。永隆元年五月丁酉。太白晝見經天。是謂陰乘陽。陽君道也。中宗景龍三年六月癸巳。太白晝見在東井。京師分也。睿宗先天十四年十月甲寅。太白晝見。玄宗開元十四年十月甲寅。太白晝見。肅宗至德二載七月己酉。太白晝見經天。至于十一月戊午不見。歷秦周楚鄭宋燕之分。正元三年閏五月戊寅。太白晝見四十餘日。十年夏四月。太白晝見。代宗永泰元年九月辛卯。太白晝見經天。十一年閏八月丁酉。太白晝見經天。大曆七年八月。太白晝見。八年八月己丑。入太微晝見。十一年閏八月丁酉。太白晝見。德宗建中十年四月。太白晝見。貞元三年五月戊寅。太白晝見。九年。太白晝見。新唐書德宗貞元十年正月。太白晝見。四月。太白晝見。憲宗元和九年十月。太白晝見。穆宗長慶元年三月庚戌。太白晝見。二年九月。太白晝見。四年三月庚午。太白晝見經天。六月己丑晝見。文宗太和二年六月己酉。太白晝見。六年四月己丑。太白晝見。九年夏。太白晝見。自軒轅至于翼軫。開成二年六月己酉。太白晝見。僖宗乾符二年四月庚辰。太白晝見在昴。昭宗光化三年十月甲戌。太白晝見在斗。去地一丈而墜。十一月丁未。太白晝見。天復元年五月己酉。至己亥。太白晝見經天在井度。天祐元年二月

辛卯。太白晝見昴西。色赤炎燄如火。五代史後唐莊宗同光二年六月甲子。太白晝見。己巳亦晝見。明宗天成元年七月庚申。太白晝見。長興二年八月戊子。太白晝見。資治通鑑後漢隱帝紀。乾祐二年。太白晝見。民有仰視之者。為邏卒所執。侍衛都指揮使史弘肇腰斬之。宋史天文志太祖開寶元年六月丁丑。太白晝見。戊寅復見。太宗淳化元年六月庚午。七月丁丑。十一月戊戌。皆晝見。真宗咸平三年六月己未。晝見。四年十二月丙寅。晝見在南斗。六年五月甲午。八月庚午。皆晝見。景德元年十一月辛亥。晝見。二年四月甲辰。晝見。三年七月乙巳。晝見。庚申又見。九月戊子。見西方。十二月癸酉又見。大中祥符元年七月庚申。晝見。四年六月丙午。八月乙巳。皆晝見。六年四月壬午。晝見。七年七月癸卯。晝見。九年五月庚午。晝見。天禧三年六月辛卯。復見。四年七月丁巳。晝見。五年六月丙午。晝見。乾興元年十一月壬辰。又見。天聖三年六月壬戌。十二月戊寅。皆晝見。五年五月壬寅。晝見。明道元年七月。晝見二十日。慶曆三年八月甲寅。晝見。皇祐三年四月丙午。晝見。至和元年五月壬辰。九月己丑。十月辛卯。皆晝見。三年四月己丑。晝見。五年九月初三日。太白晝見。嘉祐二年六月己未。晝見。四年正月庚寅。晝見。七月辛丑。晝見。五

年九月庚寅晝見。六年六月乙丑晝見。七年五月戊午晝見。七月己酉經天復見。十月乙未晝見。英宗治平元年正月戊戌晝見。六月辛酉晝見。二年七月丁丑晝見。十二月辛亥又見。四年二月丁酉晝見。閏三月癸未晝見。五月辛巳晝見。七月癸卯。八月丁未晝見。神宗熙寧元年十一月癸酉晝見。二年六月壬戌晝見。三年五月癸巳。九月壬子。五年二月癸亥。五月丙午。八年三月戊午。七月戊寅。皆晝見。九年十月乙酉晝見。十年五月甲戌晝見。元豐元年四月癸亥晝見。三年七月戊子晝見。四年七月己丑晝見。六年八月己卯晝見。七年十一月乙卯晝見。哲宗元祐元年六月庚戌晝見。十月庚寅晝見。三年二月辛丑晝見。七月辛未又見。六年四月壬寅晝見。閏八月乙丑又見。七年十一月辛巳晝見。八年四月己未晝見。紹聖元年五月己酉晝見。九月庚申又見。二年十一月丙申晝見。三年五月壬子晝見。四年六月己酉晝見。元符二年五月甲辰晝見。八月癸巳又見。徽宗崇寧元年六月己酉晝見。三年正月癸卯晝見。五年正月十四日太白晝見。大觀二年十一月丁未晝見。四年十月戊戌又見。政和三年十二月辛酉晝見。六年十月己丑晝見。七年三月辛未晝見。重和元年十月己卯晝見。宣和二年六月丁丑晝見。六年十一月

丙子晝見。高宗建炎元年十月甲戌晝見。紹興元年四月壬申晝見。四年六月庚子。十一月戊申。晝見經天。六年正月壬辰晝見經天。十七年五月辛丑晝見。七月辛巳晝見。二十八年六月壬辰晝見。孝宗隆興元年七月丙申。經天晝見。二年六月戊辰晝見。七月庚子。經天晝見。乾道元年三月甲寅晝見。乙亥晝見經天。二年四月甲申晝見。五月甲寅。經天晝見。九月庚午晝見。三年九月戊子。四年五月乙丑晝見。與日爭明。五年六月庚寅晝見。十一月甲子晝見。庚午晝見。淳熙三年五月癸酉。經天晝見。四年十一月壬戌。又見。六年七月乙丑晝見。九年六月庚申。晝見。九月癸巳。十一年五月乙卯。十二年六月戊寅。晝見。七月丁酉。經天晝見。至八月壬申。始滅。十四年六月辛卯。晝見。七月辛丑。晝見。光宗紹熙元年五月丙子。晝見。與日爭明。四年六月丙寅。晝見。七月乙丑。十一月甲戌。晝見。寧宗慶元元年三月庚寅。經天晝見。七月己亥。晝見。四年九月壬寅。晝見。嘉泰元年六月丙午。經天晝見。十一月己巳。晝見。十二月己卯。經天晝見。三年六月癸亥。經天晝見。開禧元年三月庚申。二年五月壬寅。三年十二月乙巳。晝見。與日爭明。嘉定元年五月甲子。四年七月壬戌。五年九月丙午。六年二月丁丑。晝見。七年五月丁丑。八月乙巳。九月壬戌。晝

見。九年五月癸酉。十年五月乙丑。畫見。十一月庚辰。畫見。十二年二月庚子。畫見。三月丁亥。經天。畫見。六月辛未。畫見。辛亥。經天。畫見。十三年九月甲午。十四年三月甲午。十五年五月庚戌。九月辛未。畫見。十七年六月丁卯。畫見。經天。理宗寶慶元年六月辛卯。畫見。紹定五年四月丁丑。畫見。端平二年四月丁亥。七月戊戌。畫見。經天。嘉熙元年二月己酉。二年五月辛巳。八月辛酉。畫見。經天。三年十二月辛酉。四年二月丁未。及淳祐元年六月庚寅。畫見。十月戊戌。畫見。二年十二月壬戌。畫見。三年七月己亥。四年八月壬辰。五年二月辛卯。畫見。經天。六年四月辛酉。八月壬子。畫見。九月戊辰。畫見。經天。七年十月辛巳。九年十二月戊申。十一年二月乙卯。七月癸亥。及寶祐二年九月丁卯。三年十月甲戌。四年五月丁未。五年七月己未。及開慶元年六月壬寅。及景定三年四月庚寅。閏九月甲申。五年四月戊午。五月乙亥。及度宗咸淳元年七月丁酉。四年九月癸酉。及幼主德祐元年七月丙子。俱畫見。遼火聖宗統和八年十一月丁酉。及大安四年正月甲寅。皆畫見。金火太宗天會十三年正月辛巳。太白畫見。凡四十餘日。伏。熙宗天眷二年五月戊子。太白畫見。八月丁丑。畫見。皇統八年十月甲申。太白畫見。十二月丙寅。太白畫見。海陵王天德二年

九月乙亥。太白畫見。至明年正月辛卯。伏不見。貞元二年七月癸丑。太白畫見。凡三十有三日。伏。正隆二年正月庚辰。太白畫見。凡六十七日。伏。四年十二月太白。畫見。凡七日。五年二月丁卯。太白畫見。四年甲戌。復見。六年九月丙申。太白畫見。世宗大定二年正月癸巳。太白畫見。三年正月庚子。太白畫見。凡百有十日。乃伏。七月庚戌。太白畫見。凡百二十有七日。乃伏。八月丙寅。太白畫見。十一月庚寅。太白畫見。四年十二月辛卯。太白畫見。六年四月辛丑。太白畫見。八十有八日。伏。六月太白。畫見。九月壬子。太白畫見。百有三日。乃伏。十月壬子。復畫見。十一月七日庚申。太白畫見。十二月戊子。復見。七年十一月壬申。太白畫見。九十有一日。伏。八年三月己丑。太白畫見。百五十有八日。乃伏。九年四月丁酉。太白畫見。十有六日。伏。十一年八月癸卯。太白畫見。十二年八月丁亥。太白畫見。在日前。九十有八日。伏。十三年閏正月辛酉。太白畫見。四十有九日。伏。十四年三月辛丑。太白畫見。十有八日。伏。六月己未。太白畫見。三十有九日。八月己卯。又見。百三十二日。乃伏。十一月甲子。太白畫見。八十有六日。伏。十六年五月甲寅。太白畫見。五十有四日。伏。十七年十二月己巳。太白畫見。四十有四日。伏。十九年七月丙子。太白畫見。四十有五日。伏。二十一年二月戊

成。太白晝見。三月甲子太白晝見。二十二年五月甲申太白晝見。六十有四日伏。八月戊辰太白晝見。百二十有八日。二十三年十月辛酉太白晝見。百四十有九日乃伏。二十四年四月乙未朔太白晝見。百四十有五日乃伏。二十五年十一月壬午太白晝見。在日後。百十有一日乃伏。十二月甲子太白晝見。二十七年六月庚辰太白晝見。百七十有三日乃伏。七月丙午太白晝見。十二月甲子晝見。經天。二十八年十一月庚子太白晝見。在日前。四十有九日伏。二十九年五月庚寅朔太白晝見。在日後。章宗明昌元年二月丁亥太白晝見。二年十一月乙丑晝見。五年十一月癸丑太白晝見。在日前。三十有三日伏。六年正月庚寅太白晝見。在日前。百有二日乃伏。六月庚辰復晝。見在日後。百六十七日。爲是經天。永安元年九月壬午太白晝見。在日前。百有七日乃伏。二年二月丁巳太白晝見。在日後。百九十有五日乃伏。泰和三年六月戊戌太白晝見。在日後。百有十日乃伏。六年五月甲申太白晝見。在日前。七十有六日。七月壬申晝見。經天。八月己未卯正初刻太白晝見。在日前。庚申卯正初刻太白晝見。在日後。壬申太白晝見。八年七月戊戌朔太白晝見。在日後。衛紹王大安元年二月己丑朔太白晝見。宣宗貞祐二年九月丁亥太白晝見。於

軫。三年十二月庚寅太白晝見。於危。八十有五日伏。四年四月丁酉太白晝見。於奎。百九十有六日乃伏。興定元年四月戊辰太白晝見。於井。百六十有二日乃伏。十一月丙戌太白晝見。三年五月壬子太白晝見。於參。三十有六日。經天。又百八十四日乃伏。四年六月己巳太白晝見。於張。百八十有四日乃伏。五年正月辛丑太白晝見。於牛。二百三十有二日乃伏。司天夾谷德玉等奏。以爲臣強之象。請致祭以禳之。宣宗曰。斗牛吳分。蓋宋境也。他國有災。吾禳之可乎。閏十二月己亥太白晝見。於室。元火憲宗六年六月太白晝見。世祖至元二十四年十一月庚子太白晝見。十二月丙寅又見。三十一年四月戊申太白晝見。八月庚辰晝見。成宗元貞元年十月戊辰太白晝見。二年正月丙戌太白晝見。大德元年六月乙未太白晝見。七年九月丙寅太白晝見。十年十二月壬寅太白晝見。武宗至大元年十一月庚申太白晝見。三年三月戊辰晝見。仁宗皇慶元年四月丙子太白晝見。二年七月辛卯太白晝見。乙未丙辰皆如之。八月戊午朔晝見。延祐二年正月己未太白晝見。二月戊子晝見。五月庚午晝見。六月甲申晝見。三年九月癸丑太白晝見。六年十月庚午晝見。泰定帝致和元年二月壬戌太白晝見。七月丙戌太白晝見。天曆二年六

月丁未太白晝見。至順二年二月壬子太白晝見。六月丁未晝見。順  
帝元統元年正月癸酉太白晝見。二月戊戌晝見。二年四月戊寅晝見。辛  
巳壬午皆如之。五月丙辰晝見。七月己酉晝見。十月戊辰十二月乙亥皆  
晝見。仍改至元元年十月戊辰晝見。三年四月庚子五月戊申戊午辛酉  
六月壬午己丑庚寅七月庚戌辛酉十月庚午丁亥庚寅辛卯丙申六年  
六月癸卯己酉辛亥七月甲寅丁巳壬戌癸亥乙丑丙寅癸酉。至正元  
年正月甲戌乙亥丙子丁丑二月己卯庚辰丙戌二年七月丁酉八月丙  
午十年七月辛未壬申丁丑壬午八月癸丑丁酉九月癸丑朔十一年十  
月己丑十一月丁卯十二月丙子丁酉壬寅十二年三月戊辰十三年七  
月戊辰十五年八月戊寅九月丁丑十八年七月戊申二十一年六月甲  
辰二十三年二月戊戌庚子五月壬午甲午壬戌七月乙酉丙戌辛卯八  
月己酉壬子己未二十四年九月乙丑二十五年正月丁卯戊辰二十六  
年七月甲辰丙午丁未戊申八月辛亥二十七年十一月戊寅俱太白晝  
見。宋來潔齋集輪對劄子 神宗熙寧三年九月二十五日司天監言太  
白晝見。距九年冬數出晝見。占者以為王兵。而澧湖南安南用兵。茲其應  
也。臣聞夜則見晝則伏。不敢與太陽敵。星之常也。當伏而見。與日爭明。失

其掌矣。故其占主兵。兵戈將動於下。則金星先變於上。吁。可畏哉。我神宗  
皇帝憤北湖之疆。故先從事於西戎。所以斷匈奴右臂也。於是乎復洮岷。  
克梅山。降木征。而南則復有交州之役。兵連而不解。金星晝見之應。昭然  
不誣。自陛下踐祚以來。星變屢矣。而太白之失常。未有如今歲之甚者。蓋  
自五月二十一日以迄于今。涉歷五旬。晴必晝見。前代之所無有。史策之  
所不載。有識之士。深為國憂之。陛下誠心畏天。每遇水旱。戒膳徹樂。憂形  
玉色。引咎責躬。齋潔致禱。凜乎有淵水之懼。今而星變異常。其占主兵。乃  
疆場將擾。事變方殷之兆也。而九重之上。晏然自若。不以為憂。何哉。董仲  
舒有言。國家將有失道之敗。而天乃先出災異以譴告之。不知自省。又出  
恠異以驚懼之。尚不知變。而傷敗乃至。以此見天心之仁愛人君。而欲止  
其亂也。金星晝見之久。可謂恠異矣。此乃天心仁愛陛下。欲出此大異所  
以警懼之也。而陛下曾不以為虞。過夫傷敗之至。雖悔其可追乎。臣仰觀  
乾象。俯察人事。竊料今日之勢。雖欲幸其無變。而不可得。夫既不能無變。  
而吾之將帥則庸懦。師徒則畏怯。財用則匱乏。藩籬則踈漏。其果可以應  
敵乎。將擁兵於外。而專事交結。多方撻剋。以充苞苴。軍人愁苦無聊。而主  
將恬不加恤。名曰教閱。未始班賞。無以激厲。誰復振作。以不教之卒。而使

之戰鬪。則有望風遁逃而已。此今日之大弊也。自古名將守邊。其財皆得自用。以勵士卒。則人人慕賞。爭自奮於功名。以遣間諜。則冒死不顧。密窺敵之動息。太祖之任邊將。得此道矣。中興之初。岳飛、韓世忠之流。皆有不勝用之財。此所以能禽敵而制勝也。今之任將。毋乃與此異乎。城壁之經營。固所當務也。而板築並興。則恐力有不及。不若擇其至急者先之。合數城之力。以築一城。則無患乎不堅。合數城之兵。以守一城。則無患乎不足。他日或有遺力。則又築其次急者。至於公論。皆以為可緩者。則姑已之。昔者漢惠帝之三年春。發長安六百里內男女十四萬六千人。城長安。六月發諸侯王列侯徒隸二萬人。城長安。五年發長安六百里內男女十四萬五千人。城長安。九月長安城成。未以漢家全盛之時。築一城。易事爾。而三年之間。三興大役。始克為之。今邊方單弱如是。而乃欲於一二年之內。辦集茲事。其可得乎。力既不及。飾辭固上。勢所必至。其可恃以為固乎。臣所謂藩籬疎漏者此也。陛下誠能因此星變。慨然發憤。大修武備。將帥也。師徒也。財用也。藩籬也。皆大變於前日。則一以待不虞矣。不然。固未知其所終也。臣不勝憂國愛君之心。惟聖主察之。王十朋梅溪集太白晝見太白晝見久矣。予是日始親君之。八月二十六日。煌煌太白生東方。追逐殘

月生光芒。太陽中天不肯藏。過午一點猶微滯。太史占之此何祥。咸憂兵起人流亡。金行用事多災傷。六月十五日大風水。七月朔日又作。八月二

十一夜地震。日秋七月不雨。浙西飛蝗蔽天。大風地震水旱蝗。有一于此

宜預防。雜然並見何以當。臣言天意未可量。滔天赤地興堯湯。偃禾拔木

悟成王。宋景一言國乃昌。災異不作憂楚莊。吾皇修德應彼蒼。去讒遠佞

任忠良。推誠納諫立紀綱。丙修政事仍外攘。誓雪國耻還封疆。強虜當弱

吾當強。天文志。太白與日爭明。強國弱。弱國強。天戒為福非為殃。願勿徒

以虛文禳。太白經天。史記秦始皇時太白經天。東漢書安帝永初五年

六月辛丑。太白經天。永寧十年之中。太白經天。桓帝延熹九年七月

丙戌。太白經天。晉書恭帝元熙元年七月己卯。太白經天。宋書文帝元嘉

六年五月。太白經天。二十五年正月。太白經天。二十七年夏。太白經天。二

十九年正月。太白經天。南齊書武帝永明十一年五月戊午。太白經天。隋

書天文志。梁武帝普通六年六月癸未。太白經天。魏書世祖始光二年。太

白經天。太平真君七年正月。太白經天。十一年正月甲子。太白經天。孝文帝太和元年九月丁亥。太白經天。孝武帝永熙元年九月。太白經天。唐書天文志。高祖武德九年六月丁巳。太白經天。已未。又經天在秦分。

八月丁巳。太白經天。太白上公經天者。陰乘陽也。高宗龍朔元年六

月辛巳。太白經天。調露二年五月二十四日。太白經天。永隆元年五

月丁酉。太白經天。延和初七月。太白經天。肅宗至德二載七月己酉。

太白經天。至于十一月戊午不見。代宗永泰元年九月辛卯。太白經天。

十一年閏八月丁酉。太白經天。大曆十一年閏八月丁酉。太白經天。

昭宗天復元年五月丁酉。太白經天。五代史唐莊宗長興二年十月壬辰。

太白經天。四年五月癸卯。太白經天。漢高祖天福十二年四月丙子。太

白經天。乾祐二年四月壬午。太白經天。周太祖廣順二年。太白經天。

宋史天文志。高宗紹興四年十一月戊申。太白經天。六年正月壬辰經天。

孝宗隆興元年七月丙申。太白經天。二年七月庚子。太白經天。乾道

元年三月乙亥。太白經天。二年五月甲寅。太白經天。三年六月辛卯。太白

經天。四年六月辛卯經天。淳熙三年五月癸酉。太白經天。四年十一月

壬戌。太白經天。六年七月癸未。太白經天。九年六月甲子。太白經天。十二

年七月丁酉。太白經天。八月壬辰始滅。十四年七月辛丑。太白經天。寧

宗慶元元年三月庚寅。太白經天。四年九月癸卯。太白經天。嘉泰元年

六月丙午。太白經天。十二月己卯。太白經天。三年六月癸亥。太白經天。

嘉定十年五月癸酉。太白經天。十一月戊戌。太白經天。十二年三月丁亥。

太白經天。六月辛亥。太白經天。十七年六月丁卯。太白經天。理宗紹定

五年五月癸未。太白經天。端平元年十一月壬戌。太白經天。二年七月戊

戌。太白經天。嘉熙二年八月辛酉。太白經天。淳祐元年十月戊戌。太

白經天。六年九月戊辰。太白經天。金史熙宗皇統七年正月丁亥。太白經

天。七月己巳。太白經天。八年十一月壬辰。太白經天。天德四年正月癸

卯。太白經天。五月己亥。太白經天。丁巳。太白又經天。十二月乙卯朔。太白

經天。閏十二月己亥。太白經天。海陵王貞元二年正月辛丑。十二月乙

卯。太白經天。閏月乙酉。太白經天。三年正月庚申。太白經天。正隆三年

九月己未。太白經天。至明年二十一日不見。世宗大定三年六月辛巳。

太白經天。八月丙寅。太白經天。九月丙辰。太白經天。十一月庚寅。太白經

天。十二月丙子。太白經天。四年十二月辛卯。太白經天。六年六月辛巳。太

白經天。九月丙辰。太白經天。十月壬子。太白經天。十一月七日庚申。太白

經天。十二月戊子。太白經天。十四年三月丙辰。太白經天。凡二日而沒。六

月己未。太白經天。二十五年十二月甲子。太白經天。二十七年七月丙午。

太白經天。章宗承安二年二月己未。太白經天。泰和六年五月庚戌。



太白經天。壬申太白經天在日後。衛紹王大安元年二月己丑。太白經天。宣宗興定三年五月壬子。太白經天。又百八十四日乃伏。六年七月乙亥。太白經天。與日爭光。元史世祖至元二十六年七月戊子。太白經見四十五日。三十一年九月丁巳。太白經天。成宗元貞元年十一月甲戌。太白經天。大德元年十月戊午。太白經天。十一月戊子。太白經天。十二月甲辰。太白經天。二年十二月戊午。太白經天。三年正月乙巳。太白經天。七年十月丁亥。太白經天。十一月己未。太白經天。十二月丙戌。太白經天。九年七月甲寅。太白經天。十月丙戌。太白經天。十二月壬申。太白經天。武宗至大三年十月甲辰朔。太白經天。四年十二月庚辰。癸未。壬辰。俱太白經天。仁宗皇慶元年四月庚寅。太白經天。二年七月丁巳。太白經天。延祐二年二月癸巳。太白經天。三年九月丙寅。太白經天。英宗至治元年六月辛酉。太白經天。十月甲辰。太白經天。三年五月戊戌。太白經天。泰定帝泰定元年十二月乙亥。太白經天。三年七月戊辰。太白經天。四年閏九月己巳。太白經天。明宗天曆元年七月癸亥。太白經天。文宗天曆二年七月癸亥。太白經天。至順二年五月辛丑。太白經天。順帝元統二年二月丁亥。太白經天。四月丁丑。太白經天。七月己亥。太白經天。甲

辰亦如之。丙午復如之。庚戌太白經天。癸丑太白經天。甲寅亦如之。八月丙辰朔。太白經天。丁巳。戊午。己未。亦如之。癸亥。丙寅。戊辰。辛未。壬申。癸酉。甲戌。丁丑。己卯。庚辰。壬午。皆如之。至元元年十二月甲子。經天。丙寅。經天。丁卯亦如之。庚午。經天。壬申亦如之。戊寅。經天。二年二月甲申。太白經天。六月庚午。太白經天。辛未亦如之。甲戌。乙卯復如之。七月癸卯。乙巳。丙午。甲寅。壬戌。癸亥。甲子。十一月丁酉。己亥。丁巳。戊午。癸亥。甲子。乙丑。四年十二月癸卯。己酉。庚戌。辛亥。丙辰。五年七月甲戌。乙亥。丙子。戊寅。乙酉。丙戌。八月戊子。己丑。庚寅。辛卯。戊戌。己亥。壬寅。甲辰。九月戊午。己未。至正二年五月甲申。十一年十二月丁丑。庚辰。丙戌。辛卯。壬辰。甲午。庚子。辛丑。十三年九月壬辰。十月庚子。十五年閏正月丙辰。五月癸丑。六月癸亥。皆太白經天。

永樂大典卷之七千八百五十六

永樂大典卷之七千八百五十七 十九庚

星

占太白星

西漢書高祖三年秋太白出西方有光彗中。晉灼曰。彗中。近喻身。乍死乍南。過期迺入辰星。出四孟。韋昭

曰。法當出四仲。出四孟。易主之象也。是時項羽為楚王。而漢已定三秦。與相距滎陽。太白出西方有光彗中。是秦地戰將勝。而漢國將興也。辰星出四孟。易主之表也。後二年漢滅楚。武帝元鼎五年太白入于天苑。占曰。將以馬起兵也。一曰。馬將以軍而死。耗其後以天馬故。誅大宛。馬大死於軍。昭帝始光中。太白出西方。下行一舍。復上行二舍而下去。太白金星。上復下。將有戰死者。後出東方入咸池。東下入東井。人臣不忠。有謀上者。後入太微西蕃第一星北。出東蕃第一星北。東下去。太微者天廷也。太白行其中。宮門當閉。大將被甲兵。邪臣伏誅。東漢書光武建武九年七月乙丑。太白犯軒轅大星。十一月乙丑。又犯之。軒轅者後宮之官。大星為皇后。金犯之為失勢。時郭后已失勢。見疎。後廢為中山后。明帝永平十五年

十一月乙丑。太白入月中。為大將戮。人主亡。不出三年。後三年明帝崩。十六年四月癸未。太白犯畢。為邊兵。後北匈奴寇入雲中。至咸陽。使者高弘發三郡兵追討。無所得。太僕祭彤坐不進。下獄。孝章帝建初元年正月丁巳。太白在昴西一尺。八月庚寅。彗星出天市。長三尺。稍行入牽牛。三度積四十日。稍滅。太白在昴。為邊兵。彗星出天市。為外軍。牽牛為吳越。是時蠻夷陳縱等。及哀牢王類。反攻雋唐城。永昌太守王尋。走奔檉榆。安夷長宋延。為羗所殺。以武威太守傅育。領護羗枝尉。馬防行車騎將軍。征西羗。又阜陵王延。與子男魴謀反。天逆無道。得不誅。廢為侯。王莽地皇四年秋。太白在太微中。燭地如月光。太白為兵。太微為天廷。太白羸而北。入太微。是大兵將入天子廷也。是時莽遣兵至昆陽。為光武所破。漢將鄧舉等進攻京師。十月殺莽。大兵蹈籍宮庭之中。更始入長安。復敗赤眉。立劉盆子為天子。皆以大兵入宮庭。是其應也。和帝永元二年九月。太白犯軒轅。占曰。女主失勢。其年竇氏被誅。太后失勢。九月在南斗魁中。為大將將死。孝安帝永初三年正月己亥。太白入斗中。占為貴相凶。四年六月癸酉。太白入輿鬼。指上階為三公。後太尉張敏免官。太白入輿鬼。為將凶。後中郎將任尚坐贓千萬。檻車徵棄市。韓楊注曰。太白入輿鬼。亂臣在內。

臣昭以占為明。豈任尚所能惑也。元初三年五月丙寅。太白入畢口。黃帝占曰。大攻。近期十五日。遠期四十日。又曰。大臣當之。亂國易王。四年九月辛巳。太白入南斗口。黃帝經曰。大人當之。國易政。六年四月癸丑。太白入輿鬼。郝萌曰。太白守輿鬼。疾在女主。延光二年二月辛未。太白犯昴。郝萌曰。不有亡國。必有謀主。又云。入昴。大赦。五月癸丑。入畢。郝萌曰。太白入畢口。馬馳人走。又曰。有中喪。四年四月甲辰。入輿鬼。六月壬辰。出太微。九月甲子。入斗口。犯昴畢。為邊兵。一曰。大人當之。輿鬼為大喪。出太微。為中宮有兵。入斗口。為貴將相有誅。時大將軍耿寶等。構譖太子保廢之。以北鄉侯懿代。四年帝崩。立北鄉侯。侯病薨。寶等不欲立保。徵諸王子。擇所立。黃門孫程等共誅江京。閻顯立保為天子。是為順帝。皆姦人強臣。狂亂王室。其於死亡誅戮。兵起宮中。是其應也。順帝永和三年二月辛巳。戊子。太白在熒惑西南。光芒相犯。三月壬子。六月丙午。八月乙卯。太白皆晝見。太白者將軍之官。又為西州。晝見陰盛。與君爭明。熒惑與太白相犯。為兵喪。是時大將軍梁商父子秉勢。故太白常晝見也。漢安二年正月。太白晝見。七月甲申。晝見。韓楊占曰。天下有喪。一曰。有白衣之會。明年八月順帝崩。又明年冲帝崩。質帝本初元年四月辛巳。太白入輿鬼。皆為大

喪。五月庚戌犯熒惑。為逆謀。閏月一日帝為梁冀所鳩崩。桓帝永興二年閏月丁酉太白晝見。時上幸後宮采女鄧猛。後四年梁后崩。梁冀誅猛立為后。恩寵甚盛。廷喜九年七月太白晝見。經天為兵喪。入與鬼為死喪。又犯見經天。犯心前星。與鬼質星。太白犯心前星為兵喪。入與鬼為死喪。又犯質星為戮臣。靈帝建寧元年六月太白在西方。入太微犯西蕃南頭星。太微天廷也。太白行其中。宮門當閉。大將被甲兵。大臣伏誅。其年陳蕃竇武等被害。中平六年八月丙寅太白犯心前星。戊辰犯心中大星。其日未冥四刻。大將軍何進於省中為諸黃門所殺。己巳車騎將軍何苗為進部曲將吳匡所殺。宋書魏文帝黃初四年六月甲申太白晝見。五年正月太白晝見。自去年十二月在斗晝見。至于是月乙卯。案占災在吳越。十月乙卯太白晝見。占同上。又歲星入太微逆行積百四十九日乃出。占曰。五星入太微。從右入三十日以上。人主有大憂。一曰有故。至七年五月帝崩。明帝即位。大赦天下。十一月辛卯太白又晝見。案劉向五紀論曰。太白少陰弱不得專行。故以己未為界。不得經天而行。經天則晝見。其占為兵。為喪。為不臣。為更王。強國弱。小國強。是時孫權受魏爵號。而稱兵距守。七年五

月文帝崩。八月吳遂圍江夏。寇襄陽。魏江夏太守文聘固守得全。大將軍司馬懿救襄陽。斬吳將張霸。魏明帝大和三年三月己未。太白犯井北棘第一星。占曰。將軍惡之。四年十一月壬戌。太白犯歲星。占曰。太白犯五星。有大兵。犯剋宿為小兵。五年三月諸葛亮以大衆寇天水。遣大將軍司馬懿距還。六年十一月丙寅太白晝見南斗。遂歷八十餘日。恒見。占曰。吳有兵。明年孫權遣張彌等將兵萬人。九錫授公孫淵為燕王。淵斬彌等虜其衆。明帝太和四年十一月壬戌。太白犯歲星。占曰。有大兵。後諸葛亮以大衆寇天水。宣帝為大將軍距退之。青龍二年二月己未。太白犯熒惑。占曰。大兵起。有大戰。是年四月諸葛亮擄渭南。吳亦起兵應之。魏東西奔命。九月亮卒。軍退。將帥分爭。為魏所破。案占太白所犯在南。南國敗。在北。北國敗。此宜在熒惑南也。五月丁亥。太白晝見積三十餘日。以畧度推之。非秦魏則楚也。是時諸葛亮擄渭南。司馬懿與相持。孫權冠合肥。又遣陸議。孫韶等入淮沔。帝親東征。蜀本秦地。則為秦晉及楚兵悉起。三年六月戊戌。太白犯井鉞。占曰。凡月五星犯井鉞。悉為兵災。一曰斧鉞用。大臣誅。十月壬申。太白晝見在尾。歷二百餘日。恒見。占曰。尾為燕。燕臣強。有兵。時公孫淵自立為燕王。置百官。發兵距守。宣帝咸之四年五月壬寅。太白犯畢

左股第一星。占曰：畢為邊兵。又主刑罰。九月涼州塞外胡阿畢師侵犯諸國。西域校尉張就討之。斬首捕虜萬許人。七月甲寅太白犯軒轅大星。占曰：女主憂。至景初元年。皇后毛氏崩。齊王正始三年六月丙辰。太白晝見。占曰：陰國之兵疆。八月梁師寇邊。攻陷城邑。秋九月安東將軍邢巒大破之。宿豫斬將三十餘人。捕虜數萬。嘉平元年六月壬戌。太白犯東井距星。占曰：國失政。大臣為亂。四月辛巳。太白犯輿鬼。占曰：大臣誅。一曰兵起。二年三月己未。太白又犯井距星。三年七月王凌與楚王彪有謀。皆伏誅。人主遂畢。五年六月戊午。太白犯角。占曰：群臣有謀不成。高貴鄉公甘露元年十月丙寅。太白犯亢距星。占曰：逆臣為亂。二年三月庚子。太白犯東井。占曰：國失政。大臣為亂。至於景元元年高貴鄉公敗。十月丙寅。太白犯亢距星。占曰：廷臣為亂。人君憂。至景元元年有戒濟之變。及諸葛誕誅。皆其應也。吳志：吳孫亮太平元年九月壬辰。太白犯南斗。占曰：太白犯斗。國有兵。大臣有反者。其明年諸葛誕反。又明年孫綝廢亮。吳魏並有兵事也。晉書：武帝咸寧四年九月太白當見不見。占曰：是謂失舍。不有破軍。必有死王之墓。又有亡國。是時羊祜表求伐吳。上許之。五年十一月兵出。太白始夕見西方。至太康元年三月大破吳軍。孫皓面縛請死。吳國遂亡。

晉惠帝元康三年春。太白守畢。至是百餘日。占曰：有急令之憂。一曰相死。又為邊境不安。後賈后陷殺太子。惠帝元康六年十月乙未。太白晝見。後趙王殺張斐。廢賈后。以理太子之寃。因自篡盜。以至屠戮。以亂伐亂。兵喪臣亂之應也。永康二年二月太白出西方。逆行入東井。占曰：國失政。大臣為亂。是時齊王冏起兵討趙王倫。倫滅。冏擁兵不朝。專權淫奢。明年誅死。永寧元年五月太白晝見。占曰：為不臣。為更主。七月太白守右掖門。占曰：為兵。為亂。為賊。太安二年二月太白入昴。是秋守太微。占曰：天下擾兵大起。國亂。上將以兵亡。是年冬成都河間攻洛陽。八月長沙王奉帝出拒二王。二年正月東海王越執長沙王。又張方又殺之。永興元年七月庚申。太白犯角亢。經房心。歷尾箕。九月入南斗。占曰：犯角。天下大戰。犯亢有大兵。人君憂。入房心為兵喪。犯尾將軍與民人為變。箕女主憂。一曰天下亂。入南斗有兵喪。一曰將軍為亂。其所犯守。又兗豫幽冀揚州之分野。是年七月有蕩陰之役。九月王浚殺幽州刺史和演。攻鄴。鄴潰。於是兗豫為天下兵衝。陳敏又亂揚上。劉淵石勒李雄等並起。微賤跨有州郡。皇后羊氏數被幽廢。及光熙元年惠帝崩。終無繼嗣。二年四月丙子。太白犯狼星。占曰：大兵起。光熙元年四月太白失行。自翼入尾箕。占曰：太白失行。

而北。是謂返生。不有破軍。必有屠城。五月汲桑攻鄴。魏郡太守馮嵩出戰大敗。桑遂害東燕王騰。殺萬餘人。焚燒魏時宮室皆盡。十二月癸未太白犯填星。占曰。為內兵有大戰。是後河間王為東海王。越所殺。明年三月東海王越殺諸葛政等。五月汲桑破馮嵩殺東燕王。八月荀晞大破汲桑。懷帝永嘉二年正月庚午。太白伏不見。二月庚子。始晨見東方。是謂當見不見。占同上條。其後破軍殺將不可勝數。帝崩虜庭。中夏淪覆。六年六月丁卯。太白犯太微。占曰。兵入天子庭。王者惡之。七月帝崩于寇庭。天下行服大臨。元帝建武元年五月癸未。太白熒惑合於東井。占曰。金火合曰。樂為喪。是時愍帝蒙塵于平陽。七月崩于寇庭。晉元帝大興元年七月。太白犯南斗。占曰。吳越有兵。大人憂。二年八月己卯。太白犯軒轅大星。占曰。後宮憂。乙未。太白犯歲星在翼。占曰。為兵亂。三年五月戊子。太白入太微。又犯上將星。占曰。天子自將。上將誅。九月太白犯南斗。十二月己未。太白入月在斗。郭璞曰。月屬坎。陰府法象也。太白金行而來犯之。天意若曰。刑理失中。自毀其法。成帝咸康元年二月己亥。太白犯昴。占曰。兵起歲大旱。四月石虎掠騎至歷陽。朝廷慮其眾也。加司徒王導大司馬。治兵動眾。又遣慈湖牛渚蕪湖三戍。五月乃罷。是時胡賊又圍襄陽。征西將軍庾

亮遣寧雖退之。六月旱。二年九月庚寅。太白犯南斗。因晝見。占曰。斗為宰相。又揚州分金犯之。死喪象。晝見為不臣。又為兵喪。三年石虎僭稱天王。四年虎滅段遼。而敗於慕容皝。皝國蕃臣。五年王導薨。三年十一月乙丑。太白犯歲星。占曰。為兵飢。四年二月石虎破幽州。遣其人萬餘家。李壽殺李期。五年胡眾五萬寇河南。略七千餘家而去。又騎二萬圍陷郟城。殺略五千餘人。十二月癸丑。太白犯填星在箕。占曰。王者亡地。七年慕容皝自稱燕王。四年四月己巳。太白晝見在柳。占曰。為兵。為不臣。七月乙巳。月掩太白。占曰。王者亡地。大兵起。明年胡賊大寇河南。陷郟城。豫州刺史毛寶。西陽太守樊俊。皆棄城投江死。於是內外戒嚴。左衛桓監匡術等諸軍至武昌乃退。七年慕容皝自稱為燕王。九月太白犯右執法。占曰。大臣死。執政憂。其灾同金火尤甚。十一月戊子。太白犯房上星。占曰。上相憂。六年二月乙未。太白入月。占曰。人主死。四月甲午。太白犯太白。占曰。人主惡之。四月丙午。太白犯畢距星。占曰。兵革起。一曰。女主憂。六月乙卯。太白犯軒轅大星。占曰。女主憂。明年三月皇后社氏崩。七年四月己丑。太白入輿鬼。占曰。兵革起。五月太白晝見。以愍度推之。非秦魏則楚也。占曰。為臣疆。為有兵。八月辛丑。月犯輿鬼。占曰。人主憂。八年六月成帝崩。八年十二月己酉。太

白犯熒惑于胃。占曰大兵起。其後庾翼大發兵謀伐石季龍。專制上流。康帝建元元年正月壬午。太白入昴。占曰趙地有兵。又曰天下兵起。八月丁未。太白犯歲星。占曰有大兵。是年石虎殺其太子邃。及其妻子徒屬二百餘人。又遣將劉寧寇沒狄道。又使將張舉將萬餘人屯薊東。謀慕容皝。二年正月壬午入昴。占曰趙地有兵。又曰天下兵起。閏月乙酉。太白犯斗。占曰為喪。天下受爵祿。九月康帝崩。太子立。大赦賜爵也。穆帝永和元年五月辛巳。太白晝見在東井。占曰為臣疆。秦有兵。六月辛丑入太微。犯屏西南。占曰輔臣有免罷者。三年九月庚寅。太白犯南斗第五星。占曰為喪兵。四年四月太白入昴。是時戎晉相侵。趙地連兵尤甚。七月太白犯軒轅。占在趙。及為兵喪。女主憂。其年八月石虎太子宣殺弟韜。宣亦死。五年正月石虎僭稱皇帝。尋病死。是年褚裒北伐。喪衆。又尋蒙太后素服。六年正月朝會廢樂。丙申犯左執法。乙丑犯左執法。占曰為喪為兵。五年四月丁未。太白犯東井。占曰秦有兵。九月戊戌。太白犯左角。占曰為兵。六年八月辛卯。太白晝見在南斗。占同上。是歲司徒蔡謨免為庶人。七年劉顯殺石祗。及諸胡帥。中土大亂。戎晉十萬數各還舊土。互相侵略。庚子。太白犯軒轅。戊子。太白犯右執法。占悉同上。及疾疫死亡。能達者十二三。是年桓

溫輒以大衆求浮江入淮北伐。朝廷震懼。八年豫州刺史謝尚討張遇。為符雄所敗。殷浩北伐敗。被廢。十年桓溫伐符健。不克而還。七年二月太白犯昴。占曰大臣有誅。五月乙未入畢口。犯左股。占曰將相當之。八月庚午。太白犯軒轅。占曰國有兵。戊子犯右執法。占同上。八年六月丙辰。太白入南斗。犯第四星。占曰將為亂。一曰丞相免。九年二月乙巳入南斗。犯第三星。十一年八月己未。太白犯天江。占曰河津不通。十二年六月庚子。太白晝見在東井。占曰河津不通。七月丁卯。太白犯填星在柳。占曰周地有大兵。其年八月桓溫伐符健。退。因破姚襄於伊水。定周地。并平元年四月壬子。太白入與鬼。占曰秦地有兵。一曰將死。六月戊戌。太白晝見在軫。占曰秦地有兵。一曰將死。軫。楚之分也。二年十月己未。太白犯哭星。占曰人主憂。十二月月犯太白在昴。占曰人君死。一曰趙地有兵。朝廷不安。三年六月。太白犯東井。占曰人君死。一曰趙地有兵。朝廷不安。七月乙酉。太白犯與鬼。占曰人君死。一曰趙地有兵。朝廷不安。三年八月丁未。太白犯軒轅。大星。占曰為邊兵。庚午。太白犯填星在太微中。占曰王者惡之。先是二年五月。關中氐帥殺符生立堅。十二月慕容俊入也。鄴。八月安西將軍豫州刺史謝奕薨。三年十月諸葛攸舟軍入河。敗績。豫州刺史謝萬入穎。衆

潰而歸。除名為民。十一月司徒會稽王以二鎮敗。求自貶三等。四年正月慕容俊死。子熈代立。慕容殺其尚書令陽騫等。五月天下大水。五年五月穆帝崩。四年六月己未。太白入太微右掖門。從端門出。占曰貴奪勢。一曰有兵。又曰出端門。臣不臣。八月戊申。太白犯心。占曰國有憂。九月壬午。太白入南斗口。犯第四星。占曰為喪。有赦。天下受爵祿。六月丙寅。太白晝見。占曰。人君惡之。哀帝興寧元年十月丙戌。月奄太白。在須女。占曰。天下民靡散。一曰。災在揚州。三年洛陽沒。其後桓溫傾揚州資實討鮮卑。敗績。死亡大半。及征袁真。淮南殘破。後氐及東胡侵逼。兵役無已。三年十月。太白晝見。在亢。占曰。亢為朝廷有兵喪。為臣疆。哀帝是年二月崩。其災皆在海西也。明年五月。皇后庾氏崩。海西公太和元年八月戊午。太白犯歲星。在太微中。二年正月。太白入昴。後慕容暉為符堅所滅。又據司冀幽并四州。三年六月甲寅。太白奄熒惑。在太微端門中。其六年海西公廢。簡文帝咸安二年五月丁未。太白犯天關。占曰。兵起。六月。太白晝見。在七星。乙酉。太白犯輿鬼。占曰。國有憂。七月帝崩。桓溫以兵威擅權。將誅王坦之等。內外迫脅。又庾希入京城。盧悚入宮。並誅滅之。孝武帝寧康二年十一月癸酉。太白掩熒惑。在營室。占曰。金火合為孽。為兵喪。後符堅伐涼州。

破之。虜張天錫。甲申。太白晝見。在心。氐。兗州分野。後北中郎將王坦之薨。太元元年七月。符堅伐涼州。破之。虜張天錫。三年六月辛卯。太白犯東井。占曰。秦地有兵。太元四年十一月丁巳。太白犯哭星。占曰。天子有哭泣事。七年十一月。太白晝見。在斗。占曰。吳有兵喪。八年四月甲子。太白又晝見。在參。占曰。魏有兵喪。是月。桓沖征沔漢。楊亮伐蜀。並拔城畧地。八月。符堅自將統百萬。九月。攻沒壽陽。十月。劉牢之破堅將梁成。斬之。殺獲萬餘人。謝玄等又破堅於淝水。斬其弟融。堅大衆奔潰。九年六月。皇太后褚氏崩。八月。謝玄出屯彭城。經畧中州。十年八月。符堅為其將姚萇所殺。七月丙戌。太白晝見。十一月丁巳。又晝見。十年四月乙亥。又晝見。于畢昴。占曰。魏國有兵喪。是時。符堅大衆奔潰。趙魏兵連相攻。堅為姚萇所殺。十二月己丑。太白犯歲星。占曰。為兵饑。是時。河朔未平。兵連在外。冬。大饑。十一年二月戊申。太白晝見。在東井。占曰。秦有兵。臣疆。六月甲申。又晝見。于輿鬼。占曰。秦有兵。時。魏姚萇符登連兵相征不息。十二年十月。庚午。太白晝見。十五年十一月。太白入羽林。占曰。天子為軍。自守。有反臣。二十一年九月。孝武帝崩。隆安元年。王恭殷仲堪桓玄等。並發兵表誅王國寶。朝廷從而殺之。并斬其從弟緒。司馬道子。由是失勢。禍亂成矣。十九年十月癸



丑太白犯歲星在斗。占曰為飢。為內兵。斗吳越分。至隆安元年王恭等眾兵顯王國寶之罪。朝廷赦之。是後連歲水旱民飢。二十年七月丁亥。太白入太微。占曰為饑。安帝隆安元年四月丁丑。太白晝見在東井。占曰秦有兵。六月姚興攻洛陽。郗恢遣兵救之。冬姚萇死。子略代立。二年閏月太白晝見在羽林。丁丑月犯東上相。辛未辰星犯軒轅星。占悉同上。是年正月楊佺期破郗恢奪其任。殷仲堪又殺之。六月鮮卑攻沒青州。十月羌賊攻沒洛陽。桓玄破荆雍。殺殷仲堪。楊佺期。孫恩聚眾攻沒會稽。殺內史王凝之。劉牢之東討走之。四年七月太皇太后李氏崩。四年十二月太白在斗。晝見。至五年正月乙卯。案占灾在吳越。元興元年二月戊子。太白犯五諸侯。因晝見。八月庚子。太白犯歲星。在上將東南。占曰楚兵飢。一曰灾在上將。二年桓玄篡位。三年劉裕盡誅桓氏。是月丙寅。太白掩右執法。九月癸未。太白犯進賢。占曰賢者誅。八月癸丑。太白犯房北第二星。十月甲戌。太白犯泣星。占曰大臣誅。二年十月丁丑。太白犯填星在婁。占曰賢者誅。三年二月壬辰。太白熒惑合于羽林。先是二年十二月桓玄篡位。放遷帝后。至三年二月劉裕起義兵。桓玄逼帝東下。義熙元年三月丁酉。太白犯

東井。占曰秦有兵。八月犯斗第一星。占曰天下有兵。一曰大人憂。十一月丙戌。犯鉤鈴。占曰喉舌憂。二年二月太白犯南河。占曰兵起。三年五月己丑。太白晝見在參。占曰益州有兵。長。臣疆。八月太白犯左執法。己卯。熒惑。占曰有大兵。次年姚萇遣眾征赫連勃勃。大為所破。十二月辛丑。太白犯歲星在奎。占曰大兵起。魯有兵。四年六月己丑。太白犯太微西上將。乙卯。又犯左執法。占曰天下饑。五年十二月辛丑。太白犯歲星在奎。占曰大兵起。魯有兵。是年四月劉裕討慕容超。次年二月。慕容超于魯地。六年正月。太白犯五諸侯。占曰諸侯有誅。五月乙未。太白犯少微。占曰有邊兵。六月甲午。太白晝見。占曰國有憂。一曰有白衣之會。八月壬午。太白犯軒轅大星。占曰國有憂。一曰秦有兵。九月甲寅。太白犯左執法。占曰有邊兵。七年十一月丙午。太白犯哭泣星。占曰益州兵饑。先是七月朱齡石剋蜀。蜀民尋又反。又討滅之。八年誅劉劭。皇后王氏崩。九年誅諸葛長民。十一年討荊州刺史司馬休之。雍州刺史魯宗之破之也。八年七月甲申。太白犯填星在東井。占曰秦有大兵。九年二月犯南河。占曰兵起。五月己丑。太白晝見在參。占曰益州有兵。長。臣疆。十一年六月己未。太白犯東井。占曰秦有兵。戊寅。太白犯與鬼。占曰國有憂。八月庚申。順行從右。

掖門入太微。丁卯掩左執法。占同上。十二年五月留房心之間。宋之分野。始封劉裕為宋公。六月壬子太白從行入太微右掖門。占同上。十四年三月癸丑太白犯五諸侯。占曰。亡君之戒。九月乙未太白入太微。犯左執法。丁巳又入太微。占曰。大人憂。元熙元年太白晝見。經天凡七。占曰。太白經天。人更主。異姓興。又晉自安帝義熙元年至恭帝元熙元年。太白經天者九。革代更主。臣失君之象也。宋書武帝永初二年六月甲申。太白晝見。占為兵喪。為臣彊。三年五月宮車晏駕。尋遣兵出救青司。其後徐羨之等秉權。臣彊之應也。十月太白犯填星於亢。亢。兗州分。又為鄭。占曰。大星有大兵。金土合為內兵。三年索頭攻略青冀兗三州。禁兵大出。兗州失守。虎牢沒。文帝元嘉六年八月太白犯軒轅。明年皇后崩。二十二年七月太白晝見。其冬太子詹事范曄謀反伏誅。二十八年五月太白犯哭星。三十年太子巫蠱。呪事覺。遂殺害朝臣。孝建元年荆江二州反。皆夷滅。卷舌。呪詛之象。南齊書宋孝武帝孝建元年至元徽二年。太白入太微。各八。占曰。七曜行不執道。危亡之象。貴人失權勢。主亦衰。當有王入為主。又自孝建元年至升明三年。太白經天五。占曰。天下革。民更主。異姓興。孝建二年至升明二年。太白經羽林三。占曰。國殘更世。三年四月戊戌。太白犯輿

鬼。占曰。民多疾。明年夏京邑疫疾。八月甲午太白入心。占曰。後九年大饑。至大明八年東土大饑。民死十二三。大明元年三月癸亥。太白在奎南。犯歲星。占曰。有戒諸侯。三年司空竟陵王誕反誅。三年九月太白犯南斗。占曰。大臣有反者。十月太白犯哭星。占曰。人主有哭泣之聲。自後六宮多喪。公主薨亡。天子舉哀相係。歲大旱。民饑。四年六月太白犯井鉞。占曰。兵起。斧鉞用。大臣誅。五年四月太白犯東井北轅。占曰。大臣為亂。斧鉞用。太白犯輿鬼。占曰。大臣誅。斧鉞用。人主憂。十月太白入氐中。熒惑入井中。占曰。王者亡地。大赦。兵起。為饑。十二月太白犯西建中央星。占曰。大臣相譖。七年六月太白入東井。占曰。大臣當之。太白犯東井。占曰。大臣為亂。斧鉞用。七月太白犯輿鬼。占曰。兵起。大將誅。人主憂。財帛出。八月太白犯軒轅。少民星。占曰。人主憂哭泣之聲。民饑流亡。太白入太微。占曰。近臣起兵。國不安。太白犯右執法。占曰。大臣誅。十月金水相犯。占曰。天下饑。八年四月太白入東井。入太微。犯執法。占曰。執法誅。近臣起兵。國不安。明帝泰始元年十二月己巳。太白入羽林。占曰。羽林兵動。乙亥白氣入紫宮。占曰。有喪事。明年羽林兵出討。昭太后崩。二年四月壬午。太白在月南。並出東方。為犯。占曰。有破軍死將。王者亡地。十月辛巳。太白入氐。占曰。春穀貴。十一月

癸巳太白犯房。占曰：牛多死。其年四方反叛。內兵大出。六師親戎。昭太后崩。大將殷孝祖為南賊所殺。尚書右僕射蔡興宗以熒惑犯右執法。自解不許。九月諸方反者皆平。多有歸降者。後失淮北四州地。彭城。兗州。並為虜州。汲民流之驗也。彭城。宋分也。是春穀貴。民饑。明年牛多疾死。詔太官停宰牛。四年四月太白犯填星于胃。占曰：主命惡之。六月壬寅太白犯輿鬼。占曰：民大疾死。不收其年。普天大疫。五年十月丙申太白犯亢。占曰：收歛國兵。以備北方。其年冬建安王休仁解揚州。桂陽王休範為揚州。揚州收前後常宰相居之。易相之驗也。七年晉平王休祐。建安王休仁。並見殺。時失淮北立戍以備防北虜。後三年宮車晏駕。後廢帝元徽三年七月丙申太白入角犯歲星。占曰：角為天門。國將有兵事。占於角。太白與木星會。殺軍在外。破軍殺將。其月丁巳太白入氐。氐為天子宿宮。太白兵凶之星。八月己巳太白犯房北頭第二星。占曰：王失德。九月癸卯太白犯南斗第三星。占曰：大人當之。國易政。十月丙戌歲星入氐。占曰：諸侯人君有來入宮者。四年四月丙子太白犯輿鬼西北星。占曰：大赦。五月戊申太白晝見午上。光明異常。占曰：更姓。順帝昇明元年九月丁亥太白在翼晝見經天。占曰：更姓。東昏侯永元三年十一月甲寅太白與辰星俱見南方。

是日荊州刺史蕭穎胄奉南康王寶融起兵。後即帝位。是為和帝。南史梁武帝天監十三年二月丙午失行在天關。占曰：津梁不通。又兵起。隋書天文志：普通七年正月癸卯太白歲星在牛相犯。占曰：其國君凶。易政。明年三月改元。大赦。陳帝本紀：永定二年五月丁亥太白犯軒轅。占曰：女主失勢。又曰：四方禍起。其後年少帝廢。廢後。慈訓太后崩。文帝天嘉四年九月癸未太白入南斗。占曰：太白入斗。天下大亂。將相謀反。國易政。又曰：君死。不死則廢。又曰：天下受爵祿。其後安成王為太傅。廢少帝自立。改官受爵之應也。六年正月己亥太白犯熒惑相去二寸。占曰：其野有兵喪。改立侯王。五月丁亥太白犯軒轅。占為女主憂。海臨王光大二年九月庚戌太白逆行與鎮星合在角。占曰：為白衣之會。又曰：所合之國為亡地。為疾兵。九月戊午太白晝見。占曰：國更政。易王。十一月戊子太白入氐在角。其年帝廢。魏書：太祖天興五年三月戊子太白犯五諸侯。晝見經天。九月己未又犯進賢。太白為疆侯之誠。犯五諸侯。所以興霸形也。是時桓玄擅征伐之柄。專殺諸侯。以弱其本朝。卒以于君之明而代奪之。故皇天著誠焉。天賜二年十一月丙戌太白掩鉤鈴。皆南邦之謫也。火象方伯。金為疆侯。少微以官賢材而輔南宮之化。執法者威令所由行也。天象若曰：夫

祿去公室。所由來漸矣。始則奮其賢材。以為其本朝。終以干其鈐鑄。而席其威令焉。至三年十二月丙午。月掩太白于危。危齊分也。占曰。其國以戰亡。丁未金火皆入羽林。四年正月太白晝見奎。是謂或稱王師而干君明者。占曰。天下兵起。魯邦受之。二月癸亥金火土水聚于奎婁。徐魯之分也。四神聚謀。所以革衰替之政。定霸王之命。五月己丑金晝見于參。天意若曰。是將自植攻伐。以震其主。而代奪之云爾。明元帝永興二年八月壬子。太白犯軒轅大星。占曰。有亂易政。女主憂。九月甲寅太白犯左執法。占曰。且有杖其霸刑。以戮社稷之衛。而專威令者。徵在南朝。三年七月甲申。太白犯土于井。占曰。其國內兵。有白衣之會。神瑞二年四月太白入畢。月犯而再入之。占曰。大戰不勝。邊將憂。魏邦受之。八月與木合于翼。占曰。且有內兵。楚邦受之。是月入自掖門。掩左執法。三年三月癸丑。太白犯五諸侯。秦常元年六月由右掖門入太微。三年八月犯軒轅。占曰。國有喪。女君受之。後貴人姚氏貴嬪杜氏皆薨。九月犯右執法。六年十月乙酉與上闕于亢。占曰。內兵且喪。更立王公。又兗州陳鄭之墟也。有攻城野戰之象焉。秦常二年五月太白晝見經天。占曰。時謂亂紀。革人更王。世祖始光四年五月辛酉。太白合於西方。占曰。兵起大戰。太武帝神嘉元年

五月癸未。太白犯天街。占曰。六夷鬚頭滅。二年五月太白晝見。占曰。大兵且興。疆國有弱者。是月上北征孺孺。大破之。虜獲以鉅萬計。遂降高車以實漠南。關地數千里云。三年三月至十月再犯歲星。月又犯之。占曰。有國之君。或罹兵刑之難者。且歲鍾。四年與火入東井。五月犯天關。天關外主碣山河之險。窮焉。占曰。兵革起。八月入太微。亦君自將兵象。延和元年八月癸未。太白犯心前星。乙酉犯心明堂。占曰。有亡國。近期三年。閏月戊寅犯五諸侯。占曰。四滑起。官兵起亂。太平真君五年五月太白入軒轅。占曰。有反臣。是年宋太子詹事范曄謀反。誅。七年正月太白犯熒惑。占曰。兵起。有大戰。時上討吳黨於河東。屠之。遂幸長安。二月吳軍敗績于杏城。棄馬遁去。復收合餘燼。八月乃夷之。九年七月太白犯哭星。占曰。天子有哭泣事。明年皇子真薨。高宗太安二年十二月壬寅。太白犯月。占曰。天下有兵。四年三月太白犯房。房宋分。占曰。國有變。臣有亂。五年六月犯鉞。占曰。兵起。更正朔。是歲二月司空伊敬晷。後六鎮雲中高平雍秦饑旱。明年改年為和平。復討吐谷渾什寅。遂絕河窮躡之。會軍大疫。乃還。和平元年四月太白犯東井。井鬼皆秦分。雍州有兵亂。十月入氐。占曰。兵起。後宮有白衣會。二年九月犯南斗。斗吳分。占曰。君死更政。大臣有誅者。十一

月太白犯填。填女君也。且曰有內兵白衣會。三年十月太白犯歲星。歲爲人君。而以兵喪于之。且有死君篡弑之禍。六年四月太白犯五諸侯。占曰有專殺諸侯者。五月上崩。車騎大將軍乙渾矯詔殺尚書楊寶年等。又害司徒平原王陸麗。皇太后定策誅之。太后臨朝自馮氏始。顯祖天安元年正月戊子。太白犯歲星。歲農事也。肅殺于之。是爲稼穡不登。八月丁亥。太白犯房。占曰霜雨失節。馬牛多死。九月甲寅。太白犯南斗第三星。占曰貴人將相有誅者。十一月己酉。太白犯歲星。或曰歲爲諸侯。太白主兵刑之政。再于之。事洵也。是歲九月州鎮十一旱饑。十月宋氏六王皆戮死。明年宋師敗于呂梁。江南阻饑。牛且大疫。其後東平王道符。檀殺副將及雍州刺史。據長安反。詔司空和其奴討滅之。九月詔賜六鎮孤貧布帛。宋主以後宮服御賜征北將士。後歲夏旱河決。州鎮二十七皆饑。尋又天下大疫。元年六月太白犯左執法。十月火又犯之。占曰大臣有憂。霸者之刑用。是歲六月月犯井。十月又掩之。皇興元年正月。月犯井北轅第二星。八月又蝕之。占曰貴人當之。有將死。水旱祥也。道符作亂之明年。司空和其奴太宰李峻皆薨。獻文帝皇興元年四月。太白犯鎮星。占曰有攻城略地之事。六月壬寅。太白犯鬼。秦分也。二年正月。太白犯熒惑。占曰大兵起。是時

鎮南大將軍尉元。征南大將軍慕容白曜。略定淮泗。明年徐州群盜作亂。元又討平之。後歲正月上黨王觀西征吐谷渾。又大破之。十一月又如之。是爲宮內有憂逼之象。占曰天子失其宮。四年誅濟南王慕容白曜。明年上迎太后傳位太子。高祖延興四年七月丙申。太白犯歲星在角。丁卯入氐。太白有母后之幾。主兵喪之政。以干君於外朝。而及其宿宮。是將有劫殺之虞矣。五年三月癸未。太白與火入羽林。占曰臣欲賊主。諸侯之兵盡發。承明元年五月己亥。太白與火入軒轅。庚子相逼同光。皆后妃之謫也。天若言曰。母后之釁幾貫盈矣。人君忘祖考之業。慕匹夫之孝。其如宗祀何。是時獻文不悟。至六月暴崩。實有醜毒之禍焉。太和元年五月。庚子。太白犯熒惑在張。南國之次也。占曰其國兵喪並興。有軍大戰。人主死。十一年五月庚子。太白犯畢。畢又邊也。是歲蠕蠕寇邊。明年齊將陳達伐我南鄙。陷灑陽。問歲而齊君子響爲有司所御。遂憤怒而反。伏誅。七月癸丑。太白犯軒轅大星。八月甲寅。又犯之。皆女君之謫也。天象若曰。軒轅以母萬物。由后妃之母兆人也。是固多穢。復將安用之。其物類之感。又稼穡之不滋候也。是歲年穀不登。聽人出關就食。明年州鎮十五皆大饑。詔開倉賑之。問歲。太后崩。是歲月三入井。金又犯之。占曰陰陽不和。不爲水患。

且大旱。其後連年亢陽。而吳中比歲霖雨。傷稼也。十二年七月太白犯左角。角為外朝。且兵政也。占曰。不出三年天下有兵。主子死。人君惡之。次年有子。響誅問歲。而齊室亂。十一月戊午太白犯歲。又犯火。大喪疾之祥。占曰。國無兵憂。則君有白衣之會。十二月壬寅犯填。占曰。金為長祥。后妃受之。十三年太白三犯熒惑。金火相鑠。為兵喪。為大人之譴。天象若曰。宿宮有兵喪之故。盛大者循而殘之。處其寢廟之中矣。十四年八月太白皆犯軒轅。九月癸丑而太皇太后崩。帝哭三日不絕聲。勺飲不入口者七日。納管屨。徒行至陵。其反亦如之。哀毀骨立。杖而後起。雖殊俗之萌。矯然知感焉。自九月至于歲終。凡四謁陵。又荐出紫宮之驗也。十六年二月壬子太白入羽林。占曰。天下兵起。十七年四月戊子。太白犯五諸侯。占曰。有擅刑以殘賊諸侯者。七月齊武帝殂。西昌侯以從子干政。殺二君而自立。於是高武諸子王侯相次誅夷。雖繼體相循。實有準命之禍。故天譴仍見云。世宗景明二年正月己未。與火俱在奎。光芒相掩。為兵喪。為逆謀。大人憂之。野有破軍殺將。奎徐方也。十一月甲寅太白與水俱出西方。占曰。東方大敗。時蕭衍已據夏口。平潯陽。遂沿流而東。齊主之師連戰敗績。於是長圍守之。十二月齊將張繆斬東昏以降。又戮主之徵。三年三月太白與水合。

于須女。女齊分。金水合為兵誅。四年七月太白犯軒轅大星。占為人君有白衣之會。永平元年六月庚辰。太白與歲星合于柳。柳為周分。且占曰。有內兵以賊諸侯。八月京兆王愉出為冀州刺史。恐不見容。遂舉兵反。以誅尚書令高肇為名。與安樂王詮相攻于定州。後太師彭城王勳于禁中。愉亦死之。二年四月乙丑。太白入鬼。去積尸一寸。又以兵氣干之。彊死之祥也。踰逼者事甚。鬼主驕亢之戒。五月太白犯歲星。光芒相觸。占曰。兵大亂。歲鏗不出三年。三年九月太白犯執法。是歲八月領軍于忠。擅戮僕射郭祚。九月太后臨朝。淫放日甚。至逼幸清河王懌。其後羽林千餘人。焚征西將軍張彞宅。事死者百數。朝廷不能討。於是大赦。原羽林。亦營室之故也。延昌二年二月太白失行天關北。占有關梁之兵。道不通。明年正月肅宗立。大赦天下。二月梁將任大洪。帥眾寇關城。八月犯軒轅。九月掩右執法。又犯之。是為大將軍有罹刑辟者。先是二年徐玄明斬大將張繆。來降。及高肇出征。退亦就戮。四年十月太白犯南斗。斗為吳分。占曰。大兵起。熙平二年五月丙午。太白犯月相距三寸。占曰。將相相攻。秦國有戰。七月太白犯角。角天門也。是為兵及朝廷。占曰。有謀不成。破軍斬將。是月侍中元叉矯詔幽太后于北宮。殺太傅清河王懌。八月中山王熙起兵誅元。

義不克遇害。明年春，衛將軍姜康生謀討義于禁中，事泄又死。是冬，諸將伐氐，官軍敗績。正光元年四月庚戌，太白與火合于井，相去一尺。占曰：王業易，君失政，大臣首亂，將相戮死，以用師大敗。五月丙午，犯越，相距三寸。占曰：將相攻，秦國有戰。孝昌元年五月，太白犯軒轅，在張角盛大。占曰：有暴酷之兵，張河南也。二年正月癸卯，與木相犯于牛，十一月戊申，相犯女，歲所以建國均人，女為蟄妾，牛為農夫，天象若曰：是將罹以寇戎，而喪其耕織之務矣。且曰：有亂兵大戰，而波及齊吳。莊帝永安元年七月癸亥，太白犯左角，相距四寸，光芒相掩，兵及朝廷之象。占曰：大戰不勝，貴人有來者，其謀不成。節閔帝普泰元年五月辛未，太白出西方，與月並，閔容一指，戰祥也。十月甲寅，與火歲土聚于甯參，甚明大，晉魏之墟也。且曰：兵喪並起，霸君興焉。是時勃海王歡起兵信都，改元中興。西魏孝武永熙二年九月甲寅，太白與火合於軫，相距七寸，光芒相及。占曰：是謂相鑠，不可舉事用兵，翼軫南宮之蕃，又荊州也。東魏孝靜天平四年六月，太白入東井，占曰：秦有兵，大臣當之。元象元年三月壬申，與月合，相距一寸，大戰之祥也。月象疆大之國，而金合之。秦師將勝焉。七月癸亥，太白犯七星，七星河南之分，金而犯土，將有封畿之戰。且占曰：其分亡帝。五年六

月太白入東井，占曰：秦有兵，大臣當之。漢靜帝興和二年十一月甲戌，太白在氐，與填星相犯，氐，鄭地也。武定四年十月乙卯，太白入斗口，距第四星三寸，光芒相掩。占曰：大兵起，將戮辱。又吳分也。五年正月沃野鎮人破落汗拔陵反，臨淮王或征之，敗績于五原。六月莫折大提反於秦，雍州刺史元志討之，又大敗於隴東。明年南方諸將頻破梁師，至八月社落周起上谷，其後鮮于脩禮反定州，王師比歲北征，冀方大震，既而葛榮承之，竟陷河北。五年二月日在參，彗甯參五車東井變惑。八月又彗之，閏月月在張真，再彗軒轅，太微。占曰：兵起，士卒多逃走。一曰：士卒大聚，又皆赦祥也。是時徵調驟起，兵相臨籍，又有詔內外戒嚴，將親征。自二月至六月，再大赦天下。十月月在畢，彗畢甯參，後年春又大赦。齊武成帝河清元

年七月乙亥，太白犯與鬼。占曰：有兵謀，誅大臣，斧質用。其年十月壬申，冀州刺史平秦王高歸彥反，段孝先討禽斬之于都市。又其二年殺太原王紹德，皆斧質用之應也。四年正月己亥，太白犯熒惑，相去二寸，在奎。甲辰太白熒惑，歲星合在婁。占曰：甲為齊，三星若合，是謂驚立絕行，其分有兵喪。改立侯王，國易政。後周閔帝元年五月癸卯，太白犯軒轅，占曰：大臣出令。又曰：皇后失勢。天和元年七月庚戌，太白犯軒轅大星，相去七寸。

占曰。女主失勢。大臣當之。又曰。西方禍起。其十一月癸丑。太保許公宇文貴薨。大臣當之驗也。三年三月己未。太白犯井北軒轅第一星。占曰。將軍惡之。七月隋公楊忠薨。四月辛巳。入輿鬼犯積尸。占曰。大臣誅。又曰。亂臣在內。有屠城。建德二年四月。太白掩西北星。又掩東北星。占曰。國有憂。九月犯左執法。占曰。大臣憂。執政誅。十一月壬子。太白掩填星在尾。占曰。填星為女主。尾為後宮。明年皇太后崩。宣政元年七月己未。太白犯軒轅大星。占曰。女主凶。後宣帝崩。隋氏受命。廢楊后為平樂公主。餘四后悉廢為比丘尼。八月庚辰。入太微。占曰。為天下驚。又曰。近臣起兵。大臣相殺。國有憂。其後趙陳等五王。為執政誅。大臣相殺之應也。靜帝大象元年九月己酉。太白入南斗魁中。占曰。天下有大亂。將相謀反。國易政。又曰。君死不死。則疾。又曰。天下爵祿。皆高祖受命。群臣分爵之微也。北史。胡僧詵傳。僧詵姪長粲。後主踐祚。除趙州刺史。先是望氣者上言。太白食昴。法當大赦。和士開奏。閭詔降罪人。以應之。尚書左僕射徐之才。諳練往事。語士開曰。天垂象。見吉凶。有成災者。有不成災者。紫昴趙分。或云趙地有災。古者王侯各有封邑。故分野有災。當其君長。今吾等虛名。竟不之國。刺史專令一境。善惡所歸。比來多以刺史為驗。未幾而長粲死焉。隋書。天文志。大

業二十年十月。太白晝見。占曰。大臣強。為華政。為易王。右僕射楊素。熒惑高祖及獻帝。勸廢嫡立庶。其月乙丑。廢皇太子為庶人。明年改元。皆陽失位。及華政。易王之驗也。唐書。天文志。高祖武德元年五月庚午。太白晝見。占曰。兵起。臣疆。九年太白纏秦分。傅奕奏。秦王當有天下。帝以奏付王。及太宗即位。召賜食。謂曰。向所奏幾敗我。貞觀十二年閏十二月辛巳。太白犯建星。占曰。大臣相譖。十六年五月犯畢左股。畢為邊將。十九年七月壬午。入太微。又犯左執法。光芒相及箕斗間。漢高麗地也。太白為兵。亦罰星也。新唐書。李君羨傳。先是貞觀初。太白數晝見。太史占曰。女主昌。高宗顯慶元年四月丁酉。太白犯東井北轅。占曰。秦有兵。龍朔三年六月乙酉。太白入東井。占曰。君失政。大臣有誅。上元二年正月丁卯。太白犯牽牛。占曰。將軍凶。儀鳳二年八月辛亥。犯軒轅左角。左角貴相也。武后聖曆元年五月庚午。犯天關。天關主邊事。睿宗神龍三年五月戊戌。太白入輿鬼中。占曰。大臣有誅。玄宗先天元年八月甲子。太白襲月。占曰。太白兵象。月大臣體。開元七年六月甲戌。太白犯東井鉞星。占曰。斧鉞用。代宗永泰九年九月庚子。太白入南斗。是日朱泚自幽州入朝。大曆七年七月己卯。太白入東井。留七日。非常度也。占曰。秦有兵。己丑入太微。



占曰。兵入天庭。十一月庚午太白入氐中。癸未入房。占曰。白衣會。不曰犯而曰入。蓋鉤鈴間。九年五月己未太白入軒轅。占曰。憂在後宮。九月辛丑入南斗。占曰。有反臣。又曰。有赦。憲宗元和十一年四月丙辰。太白犯輿鬼。占曰。有僇臣。穆宗長慶元年三月庚戌。太白犯五車。因晝見。至于七月。以歷度推之。在唐及趙魏之分。占曰。兵起。四年五月己丑。太白犯軒轅右角。因晝見。至于九月。占曰。相凶。文宗開成元年正月甲辰。太白掩建星。占曰。大臣相譖。昭宗天復二年五月甲子。太白襲熒惑。在軒轅后星上。遂犯端門。又犯長垣中星。占曰。賊臣謀亂。京畿大戰。十月甲戌。太白夕見。在斗。去地一丈而墜。占曰。兵聚其下。又曰。山摧石裂。大水竭。天祐元年二月壬辰。辛卯。太白夕見。昂西。色赤。炎燄如火。壬辰。有三角如花而動。搖。占曰。有反城。有火災。胡兵起。六月甲午。太白在張。芒角甚大。宋史天文志。大祖建隆元年正月甲子。太白犯熒惑。于婁。占曰。荆楚有兵。時李重進以揚州叛。討平之。太宗太平興國九年十一月戊戌。太白入氐。占曰。有兵。次年河北用兵。端拱四年十月乙丑。太白犯南斗。魁第二星。占曰。將相憂。明年右驍騎大將軍張遜卒。其年冬宰相李沆等三人罷。真宗咸平元年七月癸酉。太白犯角左星。占曰。有兵戰不勝。將軍憂。踰年虜寇河

間。副都部署康保裔戰死。二年十一月丙午。太白入南斗。占曰。丞相憂。明年宰相向敏中罷。六年四月庚辰。太白犯輿鬼。占曰。大臣有薨黜者。是秋兗王薨。景德元年閏九月丙寅。太白犯南斗。占曰。外國有使至。又曰。有赦令。其年契丹使來求和。赦河北。二年九月丁未。太白與熒惑犯太微上相。占曰。丞相有免者。明年宰相寇準罷。大中祥符三年三月壬戌。太白犯建星。占曰。大臣有出者。明年參政趙安仁罷。五年十月戊申。太白犯箕。占曰。後宮有大慶。其年立皇后。天禧元年八月甲午。太白犯房次相。占曰。將相有大憂。明年徐王薨。十月庚寅。犯進賢。占曰。卿相有憂。明年宰相向敏中卒。仁宗天聖五年九月辛丑。太白犯靈臺。占曰。日官失職。水旱失時。乙巳。犯明堂。占曰。天子易宮。宜避正殿。正寢。以順天道。皇祐四年十月丙子。太白犯南斗。占曰。兵起。嘉祐元年十月丁巳。太白入氐。占曰。天下疫。五年正月壬辰。太白犯木。占曰。為戰陣。大將有憂。宜飾兵備。六年六月乙卯。太白犯畢。距星。占曰。邊兵動。大將危。屬趙冀之分。宜備河北。七月己丑。犯土。纏井十二度。占曰。秦分兵饑。七年正月庚申。太白犯木。占曰。為饑。為兵。營室衛分。六月丁丑。犯火。在翼一度半。占曰。內有盜臣。又為兵事。翼楚分也。七月己酉。太白經天。復見。占曰。兵喪民災。臣不順命。不救則

四夷大動。蠻夷來侵。十一月癸亥犯罰。占曰。刑罰有所未中。八年四月乙丑。太白犯木在胃。占曰。趙分兵饑。英宗治平元年七月壬申。太白犯輿鬼。占曰。兵革動。孕婦多損。屬秦分。十月丙申。太白入氐。占曰。霜不時。春糴貴。宋分疫。二年四月丁巳。太白犯木。占曰。為兵飢。亦主后妃有憂。戊子犯土在張五度。占曰。太子不安。周分有兵。十二月癸卯。犯火躔危四度。占曰。有兵謀事。神宗熙寧元年十一月己丑。太白犯熒惑。主兵。客敗。主勝。或防逆謀。三年十月乙酉。太白犯填。主分兵。五年六月己酉。犯畢距星。主兵起。將有咎。六年六月癸未。犯東上相。主相有咎。亦主兵畏。七月丙寅。犯南斗距星。主國有兵事。亦主外國有使來。八年三月庚寅。犯填星。主燕分兵。閏四月甲戌。犯輿鬼西北星。主大將憂。民多疫。七月癸酉。犯歲。主秦分飢。元豐元年十二月壬戌。犯建西第二星。主大臣互譖毀。外國有使至。三年六月癸巳。犯畢距第二星。主邊兵敗。五年三月丙戌。犯填。主兵戰。女主災。七年十一月甲寅。犯歲。主大將凶。八年八月甲戌。犯軒轅少民。軒轅黃帝之神。黃帝之體。后妃之主。士職。今太白行犯。以所主占之。哲宗元祐元年閏二月戊申。犯熒惑。主兵起。七年十二月壬戌。犯雲雨。主有雨澤。萬物成。八年四月乙卯。犯熒惑。主兵起。六月乙酉。犯諸王東第二星。主宗臣

憂。紹聖元年十一月丙午。犯西咸第一星。主兵。三年二月庚戌。犯昴。主大赦。七月壬辰。犯東井。將軍惡之。先起兵者敗。又主有大水。九月丙午。犯填。主楚分有兵。元符元年十二月乙未。犯熒惑。主大兵。西國敗。二年十月乙巳。犯填。主鄭分飢。及後宮憂。三年九月丁亥。犯南西第二星。主小人在位。兵革欲興。徽宗崇寧元年六月庚辰。犯進賢。主賢者黜。三年二月癸亥。犯昴距。主胡王死。又主臣有謀。易政令。七月戊戌。犯積薪。主大旱。民流。十一月庚寅。犯辰。主國不安。先起兵者凶。四年八月庚辰。犯罰。主賞罰失平。大觀元年正月丁未。犯外屏。主障蔽。四月戊午。入井。主政急。民流。十二月己酉。犯熒惑。主君病。太子憂。二年正月甲寅。犯歲。主大戰。民饑。王者有賊。三年五月辛亥。犯天狗。主陰謀。四年二月辛巳。犯歲。占同二年。十二月壬申。十一月庚寅。犯天江。主水。政和元年二月辛丑。犯填。主兵饑。太子不安。十二月乙未。犯填。占與元年二月辛丑同。三年六月戊午。入太微垣。犯右執法。主凶。宣和二年十月己卯。犯熒惑。主君亡。天下兵起。五年五月甲寅。犯鬼。主有兵謀。十一月庚午。犯房。主人君將相憂。七年五月壬辰。犯畢。主邊兵起。民饑。七月乙未。犯歲。主王者有賊。大戰。民饑。欽宗靖康元年五月壬申。入鬼。犯積尸氣。主亂。臣在內。兵起。大臣將軍誅。六月

辛丑犯歲。主王者有賊。大戰民饑。十一月庚午犯亢。主君自將兵。高宗建炎三年七月辛巳。太白入太微垣。占邪臣伏誅。次年誅范瓊。閏八月丙戌。太白犯心前星。占兵興。殃在貴人。又主王者惡之。次逼明堂。纔一舍。帝甚惧。四年八月辛卯。太白犯五諸侯。占將相憂。九月趙鼎罷。紹興五年十一月己丑。太白犯壁壘陣。占兵起。八年五月辛卯。太白犯畢。帝謂輔臣曰。金星犯畢。占邊有敗兵。當諭張浚。令諸帥戒飾守邊者。明年鄜瓊殺呂祉。以其軍降劉豫。八年十二月戊午。太白入羽林軍。占天子以軍自守。十七年九月己卯。太白順行入太微垣。占屬楚地。於是漳州盜起。三十年六月壬申。太白入東井。占先起兵者敗。將軍犯罪。政急民流。明年虜亮入寇。光宗紹熙三年八月甲辰。太白犯權左角少民。占曰。女后宗族災。又云大臣當之。寧宗慶元元年六月丁卯。太白入東井。占先起兵者敗。將軍死。政急民流。嘉定十年七月己酉。太白犯角。占天下大戰。道路不通。是冬金虜寇四川。明年山東李全來歸。十二年六月庚辰。太白順行入井。占大水。先起兵者敗。將軍犯罪。政急民流。是歲莫簡反於屬。金史海陵王正隆六年九月丙申。太白晝見。先海陵問司天馬貴中曰。近日天道何如。對曰。前年八月二十九日。太白入太微右掖門。九月二日至端門。九日至

左掖門出。並歷左右執法。太微為天子南宮。太白兵將之象。其占兵入天子之庭。海陵曰。今將征伐。而兵將出入太微。正其事也。貴中又言當端門而出。其占為受制。歷左右執法為受事。此當有出使者。或為兵。或為賊。海陵曰。兵興之際。小賊固不能無也。是歲海陵南伐。遇弒。元虞集太白星贊。長庚之精。司兵司刑。燁燁其輝。輔日而行。歛爾光芒。順爾軌度。以安以寧。佐我昌祚。肅將金行。司天之刑。順軌出入。厥有常經。掠於軒轅。占者以告。敬恭用禱。景福來報。

## 禳金星

星宿神殺類。金星為災。用帛二尺五寸。硃砂五十。水銀二十。茯苓三文。人參三文。以綿纏裹之。送四方為福。青霄經

云。金星為災。念金剛經。及燒於蘇合香。著黃衣。帶真珠。金珠。砂。雄。黃。等。不

得契。酸。熱。物。用黃絹四尺。餠餅雜菜一盤。蜜餅一盤。香爐。酒一盞。金錢七

百貫。免災。元程端學畏齋集。禳金神臨。本命。惟神體乾之剛。肅秋之令。凡

百照臨。孰敢不敬。工祝致告。載敷休祥。又白虎臨。本命。惟神。金星之精。威

靈闕如。三索之男。命司于戌。神所照臨。尚祈陰護。虞集道園學古錄。中宮土德。位南之西。太白流英。挾威以濟。雄毅肅嚴。戈鋌利犀。尚革而從。降福

孔皆。五行之中。金主肅殺。有神孔威。司是嚴伐。歲行遇之。伊怒孰過。享我忱禱。毋敢凌越。兌為白虎。至雉至武。其德為金。威怒孰禦。白旂素車。象德以祈。風其從之。百祿是宜。於菟眈眈。為兌之神。為素為刑。莫之敢嬰。迎祭于西。為禮孔殷。神其食之。介福來臻。木性東榮。金行兌勝。刑德之交。史謹其徵。於菟眈眈。負隅若闔。率義從仁。祈報斯禱。昂畢之上。其象惟虎。有虺其武。在西之澣。金德是司。為義為刑。尚歛其威。美疾用寧。至順二年十二月二十三日祭金星。常國公奉旨。命撰祝文迎神。灑灑圓穹。三光昭明。四方八維。柔祇利貞。暗通百禩。歲事告成。犧罇多儀。來享克誠。成象於天。降靈於地。國有令儀。克致禱祀。敬恭其儀。神歸匪遲。天子萬年。福履綏之。陽主于德。陰主于刑。刑歛德揚。陟降在庭。既享既歆。以安以順。神還應遲。福以時進。

# 永樂大典卷之七千八百五十七



重錄總校官侍郎臣高拱

學士臣胡正蒙

分校官檢討臣馬自強

書寫儒士臣汪玄壽

國點監生臣李莊春

日蘇性慈